

Jiunge Nasi
Katika

Siku za
MAOMBI

10

Kurejea
Madhabahuni

Yohana 4:23

Januari 11 - 21, 2023

WWW.TENDAYSOFPRAAYER.ORG



Ujumbe kutoka NTUC na STUM

Kwa waumini wa kanisa la Waadventista wa Sabato katika Northern Tanzania Union Conference na Southern Tanzania Union Mission, na nje ya Union hizi; tunawatakia Amani, Baraka na furaha, moyo wa kumpenda Mungu na kumtumikia mnapopitia masomo haya ya 'Siku kumi za maombi' kwa mara nyingine tena.

Hatuna budi kumshukuru Mungu kwa jinsi alivyotulinda tangu Januari mwaka jana (2022) tulipokuwa na program hizi. Mungu wetu apewe sifa. Tunawakaribisha katika maombi ya mwaka huu tukishauri viongozi wa makanisa wahamasishwe waumini kushiriki kikamilifu kila siku na kwa wakati katika program hizi bila kukosa, ili wote wahesabiwe katika wale watakaopokea mibaraka itakayoandamana na maombi haya. Kanisa mahalia lipange muda muafaka kadiri inavyowezekana, utakaowawezesha waumini wote pamoja na wageni kuhudhuria.

Ikiwezekana kila Conference au field ibuni namna ya kufanya juma hili liwe ni juma la pekee na la kuvutia. Ili kufanya program hii iwe na mguso mkubwa wa kiroho, tunashauri zoezi hili lifanyike kwa kubadilishana wahudumu kanisa moja na jingine au mtaa kwa mtaa. Ikiwa kuna visa vyovyote vinavyofunua jinsi Mungu alivyodhihirisha uwezo wake kwenye jumuiya ya waumini (kanisa) au kwa mtu mmoja mmoja katika siku hizi kumi za maombi, basi visa hivyo vitumwe Union kupitia kwa Makatibu wa Chama cha Wachungaji wa Conference mahalia ili viunganishwe na visa vya sehemu zingine duniani. Bwana awabariki mnapopitia masomo haya na kuyaweka katika uzoefu. Taarifa hizi zitufikie ndani ya mwezi wa January 2023.

Masomo haya yameandaliwa na Kitengo cha Uchungaji (Ministerial) - 'Siku Kumi za Mombi'- cha Konferensi Kuu ya kanisa la Waadventista wa Sabato (GC) na kuhaririwa Katibu wa Chama cha Wachungaji wa NTUC, Mchungaji Davis Fue. Yametafsiriwa na Moseti Chacha wa kanisa la Waadventista wa Sabato la Lemara.

Ni mimi Mjoli wenu

Pastor Davis Fue

Simu: +255 764 151 340/655 151 340

Baruapepe: vugwasuji@gmail.com

YALIYOMO:

Kurejea Madhabahuni – Mwongozo wa Kiongozi	3
Utangulizi	9
Usiku wa Maombi	14
Changamoto za Kuwafikia watu walio nje	16
Ahadi za Kudai kwenye Maombi	19
Sherehe ya Siku ya Sabato	26
Mahitaji ya Kuombea ya Kanisa la Kiulimwengu	28
Siku ya 1 – Uko wapi?	32
Siku ya 2 – Kuweka Wakfu na Ukumbusho.....	35
Siku ya 3 – Asubuhi na Jioni	38
Siku ya 4 – Kinachomrudisha Mungu	41
Siku ya 5 – Yesu Anayeamka Mapema	44
Siku ya 6 – Shujaa wa Maombi ya Usiku Kucha	47
Siku ya 7 – Kanisa linaloabudu	50
Siku ya 8 – Ibada na Ujumbe wa Malaika Watatu	53
Siku ya 9 – Usipoteze Akili Yako	56
Siku ya 10 – Nitakwenda	59

KUREJEA MADHABAHUNI

MWONGOZO WA KIONGOZI

Karibu tena katika Siku Kumi za Maombi mwaka 2023! Tunaamini kuwa, katika maombi ndipo mahali uamsho unapozaliwa. Mungu ametenda miujiza mingi katika miaka iliyopita kadiri tulivyokuwa tukimtafuta katika maombi na kufunga. Roho Mtakatifu amewezesha uamsho, mabadiliko, hisia za uinjilisti zilizojengwa upya, makanisa yaliyoamshwa, na mahusiano yaliyoponywa.

Je, sauti ya Mungu imekuwa ikikuita kufanya uamsho?

Biblia imejaa ahadi kwa ajili yako:

“Ikiwa watu wangu, walioitwa kwa jina langu, watajinyenyekesha, na kuomba, na kunitafuta uso, na kuziacha njia zao mbaya; basi, nitasikia toka mbinguni, na kuwasamehe dhambi yao, na kuiponya nchi yao” (2 Nyakati 7:14).

“Nanyi mtanitafuta na kuniona, mtakaponitafuta kwa moyo wenu wote” (Yeremia 29:13).

“Na itakuwa ya kwamba mtu awaye yote atakayeliita jina la Bwana ataponywa” (Yoeli 2:32).

“Mkaribieni Mungu, naye atawakaribia ninyi” (Yakobo 4:8).

“Tazama, nasimama mlangoni, nabisha; mtu akiisikia sauti yangu, na kuufungua mlango, nitaingia kwake, nami nitakula pamoja naye, na yeye pamoja nami” (Ufunuo 3:20).

Po pote ulipo katika maisha wakati huu wa sasa, Mungu yupo karibu na wewe zaidi kuliko unavyofikiria. Anataka kumwaga mibaraka yake kwa familia yako, kwa kanisa lako, kwa jamii yako, na kwa ulimwengu wako. Ungana nasi sasa katika kutikia wito wa Kurejea madhabahuni!

Mambo ya kawaida ya maombi katika siku kumi za maombi

Miongozo ya Maombi ya Kila Siku

Tumetoa mwongozo wa maombi ya kila siku katika siku hizi kumi. Mwongozo wa kila siku husika unajumuisha aya ya Biblia itakayotumika katika kuomba, somo la kesho, aya za Biblia za kutumia katika kuomba, mapendekezo ya maombi, na mapendekezo ya nyimbo. Tunashauri kuwa ikiwezekana utoe nakala ya kurasa za miongozo ya kila siku

ili kila mshiriki aweze kuwa na nakala yake apate kufuatisha katika ule muda wa maombi.

Makanisa ulimwenguni yataungana katika kuomba yakijikita katika mada ya siku husika. Ungana nao katika kuomba kupitia katika aya na mahitaji yaliyoletwa, lakini usihisi kwamba unapaswa kupitia kwa haraka katika orodha yote ya mahitaji ya maombi. Mnaweza kugawanyika katika vikundi vidogo na kila kikundi kikaombea sehemu ya orodha ya mahitaji yenu ya kuombea

Pia tumejumuisha ukurasa unaoitwa Maombi ya Kanisa la Kiulimwengu. Ni muhimu kuomba pamoja kwa ajili ya familia ya kanisa letu la kiulimwengu, lakini unaweza kutenga muda zaidi wa kuombea mahitaji ya sehemu mahalia ikiwa kundi lako linajumuisha wageni kutoka katika jamii husika. Omba kuhusu namna unavyoweza kuwakaribisha wageni kwa ubora zaidi na kuwafanya wajisikie kuwa ni sehemu ya kundi hilo.

Muda unaopendekezwa kwa ajili ya kila Kipengele cha Maombi

Fanya muda wenu wa maombi kuwa wa kawaida na rahisi kadiri iwezekanavyo ili kikundi chenu kiweze kuelekeza mawazo katika kuomba. Muda utakaotumika katika kila kipengele utatofautiana. Mwongozo ufuatao ni mapendekezo tu:

- **Kukaribisha/Utangulizi** – dakika 2 hadi 5
- **Usomaji wa “Kesha” (mwongozo wa maombi wa kila siku)** – dakika 5
- **Kuomba Kupitia mafungu katika “Kuomba Neno la Mungu” (mwongozo wa maombi wa kila siku)** – dakika 10 hadi 15
- **Kuombea mahitaji katika “Mapendekezo zaidi ya Maombi” (mwongozo wa maombi wa kila siku)** – dakika 30
- **Kushukuru kwa nyimbo na sifa** – dakika 5 – 10

Kuombea Wengine

Hamasisha kila mtu kuombea watu watano hadi saba ambao Mungu ameweka katika maisha yao. Wanaweza kuwa ndugu, marafiki, wafanyakazi wenza, majirani, au watu wanaofahamiana nao. Wahamasishe kumwomba Roho Mtakatifu awaongoze katika kuchagua majina ya watu hao na kuhakikisha wanawafikia ndani ya siku hizi kumi za maombi. Unaweza kutoa kadi au vikaratasi ambavyo watu watatumia kuandika majina watakayokuwa wakiombea.

Huduma za Sabato katika Kipindi cha Siku Kumi za Maombi

Maombi na yalenge katika kitu mahususi, na ni vyema kushiriki pamoja shuhuda mbali mbali za maombi yaliyojibiwa katika huduma siku ya Sabato kanisani Jumamosi zote mbili. Iweni wabunifu – kuna namna nyingi za kushiriki pamoja na familia ya kanisa mambo yanayotokea katika mikutano ya maombi ya kila siku.

Sherehe za Sabato ya Kuhitimisha

Sabato ya mwisho inapaswa kutayarishwa kwa namna itakayokuwa ni muda wa furaha kuu kwa yale yote Mungu aliyotenda katika siku hizi kumi. Tenga muda wa kutosha kwa ajili ya shuhuda za maombi yaliyojibiwa, kwa ajili ya mafundisho ya kibiblia/mahubiri juu ya maombi, na kwa ajili ya nyimbo. Ongoza kusanyiko katika muda wa maombi ili kwamba hata wale ambao hawakuhudhuria mikutano ya kila siku, wapate uzoefu wa furaha ya kuomba pamoja na wengine. Tafadhali tazama mwongozo wa Sherehe za Sabato kwa mawazo zaidi.

Kufuatilia kipindi hiki cha maombi ya siku kumi

Omba ili kupata ufahamu jinsi Mungu anavyotaka kanisa au kikundi chako kuendeleza kile Alichozisha katika kipindi hiki cha Siku Kumi za Maombi. Pengine mtaendelea kukutana kila juma kwa ajili ya maombi. Au pengine Mungu anataka muanze huduma mpya ndani ya kanisa lenu au katika kuifikia jamii. Muwe tayari na kumfuata Mungu kule anapowaelekeza. Hakika mtashangazwa kadiri mnavyotembea pamoja naye. Ukurasa wa Changamoto ya Kuwafikia Wengine umejaa mawazo ya huduma.

Shuhuda

Tafadhali shiriki visa vinavyoonesha jinsi Mungu alivyotenda kazi katika Siku Kumi za Maombi! Visa vyako vitakuwa msaada na hamasa kwa wengine wengi. Shuhuda zinaweza kutumwa kwa: stories@ministerialassociation.org au kutumwa mtandaoni kwenye tovuti hii: www.tendaysofprayer.org.

Vielekezi vya kuunganika katika maombi

Kubalianeni

Mtu anapoombea hitaji fulani kwa Mungu, hakikisha kuwa wengine pia wanaombea hitaji hilo hilo na kukubaliana – kufanya hivi kuna nguvu! Usifikiri kwamba kwa sababu mtu mmoja ameomba kuhusu hitaji hilo, hakuna haja ya mwingine kuliombea. “Tena nawaambia, ya kwamba wawili wenu watakapopatana duniani katika jambo lo lote

watakaloliomba, watafanyiwa na Baba yangu aliye mbinguni” (*Mathayo 18:19*). Inatia moyo kiasi gani kuinuliwa katika maombi!

Kudai Ahadi za Mungu

Hamasisha kikundi kudai ahadi za Mungu kadiri wanavyoomba. Ni rahisi sana kujielekeza katika matatizo yetu. Lakini tunapodai ahadi za Mungu, tunaongeza imani yetu na kujikumbusha kwamba hakuna kinachoshindikana kwa Mungu. Ahadi hizo hutusaidia kuondoa macho yetu kwenye madhaifu yetu, na magumu tunayokabiliana nayo, hivyo kuyaelekeza kwa Yesu. Tunaweza kupata ahadi za Biblia za kudai kwa kila udhaifu na kila pambano. Himiza watu kutafuta ahadi nyingi zaidi kadiri iwezekanavyo na kuziandika ili waweze kuzidai katika maombi wakati ujao.

Kufunga

Alika wale wanaoungana nawe katika Siku Kumi za Maombi kufikiria aina ya kufunga watakayoshiriki, kwa mfano kufunga na kuacha kutazama televisheni, kuacha kusikiliza muziki wa kidunia, kuacha kutazama filamu, kuacha kuingia mtandaoni, kuacha kula vitu vitamu vitamu kama vile pipi, au aina nyingine ya vyakula ambavyo ni vigumu kumeng’enywa. Tumia muda wa ziada katika kuomba na kujifunza Biblia, ukimwomba Mungu akusaidie wewe na kusanyiko lako kudumu kikamilifu zaidi katika Kristo. Kwa kuchagua mlo mwepesi, tunaruhusu akili zetu kuwa sikivu zaidi kwa sauti ya Roho Mtakatifu.

Roho Mtakatifu

Hakikisha unamwomba Roho Mtakatifu akuonyeshe jambo la kuombea katika maisha ya mtu fulani au katika hali fulani. Biblia inatuambia kwamba hatufahamu tuombe nini, na kwamba Roho Mtakatifu ndiye anayetuombea.

“Hatupaswi kuomba tu kwa jina la Kristo, bali kwa uvuvio wa Roho Mtakatifu. Hii huelezea maana halisi tunaposema kuwa Roho *“hutuombea kwa kuugua kusikoweza kutamkwa.”* (Warumi 8:26). Mungu hufurahia kujibu ombi kama hilo. Tunapoomba kwa dhati na kwa nguvu tunaomba kwa jina la Kristo, katika nguvu hiyo kuna ahadi kutoka kwa Mungu kwamba anakaribia kujibu maombi yetu kama tunavyosoma kuwa, “Basi atukuzwe yeye awezaye kufanya mambo ya ajabu mno kuliko yote tuyaombayo au tuyawazayo, kwa kadiri ya nguvu itendayo kazi ndani yetu” (Waefeso 3:20)” (*Christ Object Lessons*, uk. 147, msisitizo umeongezewa).

Kutunza Taarifa ya Maombi

Kutunza daftari la kumbukumbu ya maombi kwenye kipindi chote cha Siku Kumi za Maombi kunaweza kuwa njia bora ya washiriki kuhifadhi moyoni wazo kuu la maombi ya kila siku, kufanya maagano thabiti na Mungu, na kutambua mibaraka yake kwao. Kuorodhesha maombi yetu na kutunza kumbukumbu ya majibu ya Mungu ni njia iliyothibitishwa ya kutia moyo.

Ikiwa utapenda, unaweza kutenga muda pale mnapokutanika kwa ajili ya maombi, ili watu wapate kuandika mwitikio wao kwa Mungu kwenye shajara zao binafsi za maombi. Au unaweza kutunza shajara ya kikundi cha maombi na majibu yake – linaweza kuwa ni daftari, au bango kubwa, au unaweza kutunzia mtandaoni. Inafurahisha na pia inajenga imani unapotazama nyuma na kuona jinsi Mungu alivyojibu maombi!

Kicho

Himiza na kujenga mtazamo wa kicho na unyenyekevu. Tunakaribia chumba chenye kiti cha enzi cha Mfalme wa ulimwengu. Hebu tusitumie muda huu wa maombi vibaya kwa mkao na kwa mwenendo wetu usiofaa na hata katika mazungumzo yetu. Hata hivyo, siyo lazima kila mmoja apige magoti muda wote. Unahitaji watu wawe huru kwa saa moja, hivyo wahamasishe watu kupiga magoti au kukaa au kusimama kadiri Mungu atakavyokuongoza na kwa namna wanavyokuwa huru zaidi.

Maombi kwa Sentensi

Maombi yanapaswa kuwa mafupi, na yaelekezwe moja kwa moja kwenye hitaji. Kufanya hivi kutawapatia wengine pia fursa ya kuomba. Jaribu kufupisha maombi yako yawe ni ya sentensi chache. Kila mmoja anaweza kuomba mara kadhaa. Maombi mafupi yatafanya kipindi cha maombi kiwe cha kufurahisha na siyo cha kuchosha na hivyo kumruhusu Roho Mtakatifu aguse kundi zima akiwaonesha namna ya kuomba. Siyo lazima kuanza na kumaliza ombi fupi la sentensi kwa maneno kama “Mungu wetu mpendwa” na “Amina.” Ni mawasiliano endelevu na Mungu.

Ukimya

Wewe kama kiongozi usitawale kipindi cha maombi. Lengo kubwa ni kuwawezesha wengine kuomba. Kipindi cha ukimya kina thamani kubwa ajabu, kwani humpa Mungu muda wa kuzungumza na mioyo yetu. Mruhusu Roho Mtakatifu afanye kazi kwa kumpa kila mmoja muda wa kutosha wa kuomba.

Kuimba

Nyimbo za hapa na pale kutoka kwa vikundi zikiunganishwa kwenye maombi, huongeza uzuri katika mkutano wa maombi. Nyimbo zilizopendekezwa zimeorodheshwa mwisho wa kila ukurasa wa wazo la siku. Siyo lazima kutumia nyimbo zote – haya ni mapendekezo tu. Kuimba pia ni njia nzuri ya kuhama kutoka kwenye kipindi kimoja kwenda kwenye kipindi kingine.

Kukusanya Mahitaji ya Kuombea

Usiulizie wala kukusanya mahitaji ya kuombea kutoka kwenye kikundi. Badala yake, waambie watu wataje mahitaji yao wakati wanapoomba na kuwahimiza wengine kujiunga wakikubaliana nayo kwa kuungana katika maombi kimya kimya. Sababu kubwa ni Muda! Kuzungumza kuhusu mahitaji ya kila mmoja kunaweza kutumia muda mwingi wa maombi. Shetani anafurahi akiweza kutudumisha katika kuzungumzia tatizo badala ya kuomba kwa ajili ya tatizo hilo. Wanakikundi wanaweza kuanza kushauriana na kupendekeza ufumbuzi. Uwezo unatoka kwa Mungu! Kadiri tunavyoongeza maombi ndivyo anavyoachia uwezo wake.

Muda wako wa kila siku

Ni wa muhimu sana! Hakikisha wewe kama kiongozi unatumia muda wako mwingi miguuni pa Yesu, ukizungumza naye na kusoma Neno lake. Ikiwa utafanya kumfahamu Mungu kuwa kipaumbele katika Maisha yako, utafunguliwa uzoefu ulio mzuri wa ajabu. “Kutoka katika sehemu ya siri ya maombi ilitoka Nguvu ya ajabu iliyotikisha dunia na kuleta Matengenezo Makuu. Hapo, kwa utulivu mtakatifu, watumishi wa Bwana waliweka miguu yao katika mwamba wa ahadi zake” (*The Great Controversy, uk. 210*). Kiongozi anapoomba, Mungu hushughulika na mioyo!

Utangulizi

Karibu katika Siku Kumi za Maombi 2023! Tunaamini kuwa, katika maombi ndipo mahali uamsho unapozaliwa. Mungu ametenda miujiza mingi katika miaka iliyopita kadiri tulivyokuwa tukimtafuta kwa kuomba na kufunga. Roho Mtakatifu amewezesha uamsho, mabadiliko, hisia za uinjilisti zilizojengwa upya, makanisa yaliyoamshwa, na mahusiano yaliyoponywa. Hapa kuna baadhi ya shuhuda katika miaka iliyopita:

“Baada ya kushiriki katika Siku Kumi za Maombi, maisha yangu ya kiroho yamebadilika kabisa.” (Josphat T.)

“Mibaraka ilikua haipimiki. Roho Mtakatifu alikuwa dhahiri kati yetu!” (Barbara J.)

“Siku Kumi za Maombi zimewaleta washiriki karibu zaidi na Bwana. Ushirika umekuwa mzuri zaidi, na watu wamenena kwamba wapo tayari zaidi kujihusisha katika utume na uongoaji wa roho.” (Arlene A.)

Je, sauti ya Mungu imekuwa ikikutia katika uamsho? Biblia imejaa ahadi kwa ajili yako:

“Ikiwa watu wangu, walioitwa kwa jina langu, watajinyenyekesha, na kuomba, na kunitafuta uso, na kuziacha njia zao mbaya; basi, nitasikia toka mbinguni, na kuwasamehe dhambi yao, na kuiponya nchi yao” (2 Nyakati 7:14).

“Nanyi mtanitafuta na kuniona, mtakaponitafuta kwa moyo wenu wote” (Yeremia 29:13).

“Na itakuwa ya kwamba mtu awaye yote atakayeliita jina la Bwana ataponywa” (Yoeli 2:32).

“Mkaribieni Mungu, naye atawakaribia ninyi” (Yakobo 4:8).

“Tazama, nasimama mlangoni, nabisha; mtu akiisikia sauti yangu, na kuufungua mlango, nitaingia kwake, nami nitakula pamoja naye, na yeye pamoja nami” (Ufunuo 3:20).

Po pote ulipo katika maisha sasa, Mungu yupo karibu zaidi kuliko unavyofikiri. Anataka kumwaga mibaraka yake kwa familia yako, kanisa lako, jamii yako, na kwa ulimwengu wako. Ungana nasi sasa katika kuomba kwa ajili ya uamsho wa kiroho kupitia kwa Roho Mtakatifu!

Mada yetu ya Maombi: Kurejea Madhabahuni – Kuandaa Mahali kwa ajili ya Mungu

Mwenye haraka na wasiwasi. Mwenye hasira na kuvurugwa. Mwenye mambo mengi na aliyevunjika.

Haya ni baadhi ya maneno ambayo watu duniani hutumia kuelezea maisha yao katika jamii ya leo yenye mambo mengi. Ikiwa na wewe pia unahisi uzito wa dunia yetu inayoangamia, tunakualika katika safari ya maombi ya siku 10 ya kuelekea kwenye moyo wa Mungu – mahali ambapo mizigo yote hubebwa, maumivu huponywa, na nguvu hujazwa upya. Utapatiwa changamoto ya kujenga upya madhabahu yako ya ibada binafsi kwa Mungu wa kweli na aliye hai, kwani ameahidi kuwa, “Nanyi mtaniita, mtakwenda na kuniomba, nami nitawasikiliza” (Yeremia 29:12).

Hebu tuombe pamoja kwa ajili ya uamsho wa madhabahu za ibada zetu binafsi na za familia, ili Roho Mtakatifu aweze kututengeneza upya na kututia nguvu ili tuweze kutangaza ujumbe wa mwisho wa Mungu wa tumaini kwa ulimwengu!

Mwongozo unaopendekezwa wakati wa maombi

- Jitahidi kufanya maombi yawe mafupi – sentensi moja au mbili zilizojengeka katika mada husika. Kisha wape nafasi wengine. Unaweza kuomba mara nyingi kadiri unavyojisikia, kwa namna ile ile unayozungumza katika mazungumzo.
- Usiogope kuwa kimya, kwani ukimya unampatia kila mmoja muda wa kumsikiliza Roho Mtakatifu.
- Kuimba nyimbo pamoja kadiri Roho Mtakatifu atakavyowaongoza ni mbaraka mkubwa. Hamhitaji kinanda ili kuwaongoza; kuimba bila ala ya mziki ni sawa pia.
- Badala ya kutumia muda wa thamani wa maombi ukizungumza kuhusu mahitaji yako ya kuombea, ni vyema uyaombe tu. Kisha wengine pia wanaweza kuombea mahitaji yako na kudai ahadi kwa ajili ya mahitaji yako.

Kudai Ahadi

Ni faida kwetu kudai ahadi za Mungu katika maombi yetu. Maagizo yote ya Mungu na mashauri yake pia ni ahadi. Hawezi kudai kutoka kwetu jambo fulani ambalo hatuwezi kufanya kwa uweza wake.

Tunapomba, ni rahisi kujielekeza katika mahitaji yetu, magumu yetu, changamoto zetu – na hasa kulalamika na kulaumu katika maombi kuhusu hali tuliyo nayo. Hili silo

kusudi la maombi. Kusudi kubwa la maombi ni kuimarisha imani yetu. Ndiyo maana tunakuhimiza kudai ahadi za Mungu katika muda wako wa maombi. Hamisha macho yako kutoka katika mahitaji yako na changamoto zako na kuyaelekeza kwa Yesu Kristo. Ni kwa kumwangukia yeye pekee ndipo tunapobadilishwa na kuchukua sura yake.

Ellen White anatutia nguvu kwamba: “Kila ahadi katika Neno la Mungu ni kwa ajili yetu. Katika maombi yako, wasilisha neno lililoahidiwa la Yehova udai kwa imani ahadi zake. Neno lake linatupatia uhakika kwamba ukiomba kwa imani, utapokea mibaraka yote ya kiroho. Endelea kuomba nawe utapata zaidi ya yale uyaombayo au uyawazayo.” (*In Heavenly Places*, uk. 71).

Ni kwa namna gani unaweza kudai hizo ahadi za Mungu? Kwa mfano, unapoomba kwa ajili ya amani, unaweza kudai Yohana 14:27 na kusema kuwa, “Bwana umetuambia katika Maandiko yako kwamba ‘Amani nawaachieni; amani yangu nawapa; niwapavyo mimi sivyo kama ulimwengu utoavyo. Msifadhaike mioyoni mwenu, wala msiwe na woga.’ Ninakuomba unipatie amani uliyoahidi kutuachia.” Kisha mshukuru Bwana kwamba atakupatia hiyo amani hata kama haujisikii kuwa na amani wakati huo.

Kufunga

Tunakuhamasisha kufanya Mfungo kama ule wa Danieli katika Siku hizi Kumi. Kuanza mwaka kwa maombi ya kufunga ni njia bora ya kuweka wakfu maisha yetu kwa Mungu kwa mwaka unaoanza. Ellen White anatuambia kuwa, “Sasa na kuendelea hata mwisho wa wakati watu wa Mungu wanapaswa kuwa na bidii zaidi, kuwa macho zaidi, kutokuamini hekima yao wenyewe, lakini kuamini hekima ya kiongozi wao, ambaye ni Yesu. Wanapaswa kutenga siku kwa ajili ya kufunga na kuomba. Kujitenga kabisa na chakula kunaweza kusiwe lazima, lakini wanapaswa kula vyakula rahisi zaidi” (*Counsels on Diet and Foods*, uk. 188, 189).

Tunafahamu kuhusu Danieli, aliyekula matunda na mboga mboga kwa siku kumi. Sisi pia tunakuhamasisha kuwa na mlo rahisi sana katika siku hizi kumi. Kama tunataka akili zilizo wazi zaidi ili kuisikia sauti ya Mungu, na kama tunataka kuwa karibu zaidi na Mungu, tunahitaji kuhakikisha kwamba chakula chetu hakiwi kikwazo.

Kufunga si kujitenga tu na chakula. Tunakuhamasisha pia kufunga kutazama televisheni, filamu, michezo ya kompyuta, na hata Facebook na YouTube. Wakati mwingine vitu visivyo vibaya, kama Facebook na YouTube, huweza kutuchukulia muda mwingi sana. Weka kando kila kinachowezekana ili uwe na muda mwingi wa kukaa na Bwana.

Kufunga siyo namna ya haraka ya kupata mibaraka kutoka kwa Mungu. Kufunga ni kujinyenyekeza wenyewe ili kwamba Mungu aweze kufanya kazi ndani yetu na kupitia

kwetu. Hebu na tusogee karibu naye kupitia maombi ya kufunga, naye atasogea karibu zaidi nasi.

Roho Mtakatifu

Hakikisha unamuomba Roho Mtakatifu akuonyeshe unachopaswa kuomba katika maisha ya mtu fulani, au katika hali fulani. Biblia inatuambia kwamba hatujui tuombe nini na kwamba Roho Mtakatifu ndiye anayetuomba.

“Hatupaswi kuomba tu kwa jina la Kristo, lakini kwa msukumo wa Roho Mtakatifu. Hii huelezea maana ya maneno kwamba Roho “hutuomba kwa kuugua kusikoweza kutamkwa.” (Warumi 8:26). Ombi kama hilo Mungu hufurahia kulijibu. Tunapomba kwa dhati na kwa nguvu tunaomba kwa jina la Kristo, katika nguvu hiyo kuna ahadi kutoka kwa Mungu kwamba anakaribia kujibu maombi yetu ‘zaidi ya tuyaombayo au tuyawazayo’ (Waefeso 3:20” (*Christ Object Lessons*, uk. 147).

Imani

Tunasoma katika Roho ya Unabii kwamba “maombi na imani vitafanya kile ambacho hakuna nguvu duniani inachoweza kufanya” (*The Ministry of Healing*, uk. 509). Pia tunaambiwa kwamba “ahadi yo yote aliyoahidi, tunaweza kuiomba; kasha tunapaswa kuamini kwamba tumeipokea, na kurudisha shukrani kwa Mungu kwamba tumepokea” (*Education*, uk. 258). Hivyo jenga tabia ya kumshukuru Mungu kwa imani kabla kwa kile anakachoenda kutenda na namna atakavyojibu maombi yako.

Ombea Wengine

Katika siku hizi kumi tunakuhimiza kuomba watu ambao Mungu amewaweka katika maisha yako kwa namna ya pekee. Chagua watu watano hadi saba – wanaweza kuwa ndugu, marafiki, wafanyakazi wenzako, majirani, au hata watu unaowafahamu tu. Tenga muda kumuuliza Mungu kuwa, angependa umuombe nani. Mwombe pia akupatie mzigo halisi wa watu hawa. Andika majina yao kwenye karatasi na uitunze sehemu salama, kama kwenye Biblia yako. Kuna jambo lenye nguvu katika kuyaandika majina hayo, na utashangazwa namna Mungu anavyofanya kazi katika kujibu maombi yako!

Changamoto ya Kuwafikia Watu walio Nje ndani ya Siku Kumi za Maombi

Yesu hatuiti kwa ajili ya kuomba tu bali anaita ili pia, kuhudumia mahitaji ya wale wanaotuzunguka. “Kwa maana nalikuwa na njaa, mkanipa chakula; nalikuwa na kiu, mkaninywesha; nalikuwa mgeni, mkanikaribisha; nalikuwa uchi, mkanivika nalikuwa mgonjwa, mkaja kunitazama; nalikuwa kifungoni, mkanijia” (Mathayo 25:35, 36).

Katika kitabu cha *Huduma ya Uponyaji (The Ministry of Healing)* tunasoma kuwa, “Tunapaswa kuishi maisha yenye sura mbili – maisha ya mawazo na matendo, na maisha ya maombi ya kimya na kazi inayofanywa kwa juhudi” (uk. 512). Tumepokea upendo mwingi sana kutoka kwa Mwokozi wetu; na tuna fursa ya kushiriki upendo huo na marafiki, majirani, hata watu tusiowafahamu wenye uhitaji.

Muulize Mungu katika maombi namna bora ya kuwafikia wengine katika Siku hizi Kumi za Maombi. Unapokuwa ukifanya kazi ya kupanga kila kitu, epuka kuruhusu shughuli hizo kukufanya ushindwe kuomba. “Jitihada binafsi kwa ajili ya wengine zinapaswa kwanza kutanguliwa na maombi mengi ya faragha; kwani hekima kubwa inahitajika ili kuelewa sayansi ya kuokoa roho. Kabla ya kuwasiliana na watu, wasiliana na Kristo. Pata maandalizi ya kuhudumia watu kutoka katika kiti cha enzi cha neema ya kimbingu.” (*Maombi*, uk. 313).

Katika nyezo za Siku Kumi za Maombi mtandaoni, utapata nyaraka iliyojaa mapendekezo mengi ya kuwafikia wengine. Yesu anakualika kuwa mikono na miguu yake kwa ulimwengu wenye uhitaji!

Kuhusu Mwandishi

Dwain N. Esmond, Ph.D. (mwanafunzi), ni mwandishi, mhariri, na mchungaji aliyewekewa mikono. Kwa zaidi ya miaka 28 Mchungaji Esmond ameitikia wito wa Mungu wa utumishi. Alitumika kama makamu mwenyekiti wa huduma za uhariri kwa Shirika la Uchapishaji la Review and Herald kabla ya kujiunga na Ellen G. White Estate mwaka 2015 kama mkurugenzi/mhariri mwenza. Ameongoza machapisho kadhaa, ikiwemo miaka 11 kama mhariri wa jarida la zamani la *Insight Magazine*. Dwain ameandika vitabu vitatu vilivyouzika sana vya maombi ya vijana na ana machapisho zaidi ya 350 kwa jina lake. Kwa sasa anasimamia uandaaji na uchapaji wa maudhui yanayohusiana na White Estate, kama *The Gift of Prophecy in Scripture and History (Karama ya Unabii katika Maandiko na Historia)*, andiko la kitaaluma juu ya kazi ya Roho Mtakatifu katika unabii; kitabu cha kasha cha Ellen White cha mwaka 2021, *Jesus: Name Above All Names (Yesu: Jina Lipitalo Majina Yote)*; na hivi karibuni, mkusanyiko wa *Ujumbe wa Malaika Watatu* (2022). Ameungana katika utume na mke wake mpenzi, Kemba, na kijana wao, Dwain Jr.

Masomo haya yameandaliwa na Idara ya Huduma,
Konferensi Kuu ya kanisa la Waadventista wa Sabato.

Isipokuwa imeelezwa, nukuu zote zinatoka katika toleo la Biblia la
“Swahili Union Bible” © 1997

USIKU WA MAOMBI:

Fikiria kuandaa huduma ya maombi ya usiku mzima kama sehemu ya Siku Kumi za Maombi. Kwa mfano, unaweza kuanza saa 12 jioni na kumaliza saa 12 asubuhi. Chagua ratiba itakayofaa kwa kundi lako.

Kwa nini kuwa na Usiku wa Maombi?

Hakuna chochote “kitakatifu” katika kukaa macho huku ukiomba usiku kucha. Hata hivyo, ni kweli kwamba usiku unaweza kuwa ni wakati wa pekee ambao watu hawana mambo mengi ya kufanya au kuwa katika hali ya haraka. Tunaamini kwamba lengo lako halipaswi kuwa kukaa macho usiku kucha, bali ni kuomba sana kadiri inavyohitajika hadi utakapokuwa umeombea vitu vyote unavyohisi kwamba Mungu anataka uviombee.

Tunapendekeza kwamba baadhi ya watu waongoze usiku huo. Hakikisha kunakuwa na mapumziko. Kama kiongozi, unaweza kuona hali ilivyo na kufahamu wakati mapumziko yanapohitajika na wakati utakapoona inafaa kuhamia katika kipengele kinachofuata cha maombi. Unaweza pia kuingiza usomaji wa vifungu vya Biblia katika muda wako wa maombi. Unaweza kufanya mambo yote yaliyopendekezwa au baadhi yake, inategemea kile kilicho bora kwa kikundi chako. Kuwa huru kubadilisha mtiririko kadiri utakavyoona inafaa.

Mapendekezo ya Mpangilio wa Usiku wa Maombi

- *Anza kwa kipindi cha sifa.* Msifu Mungu katika maombi yako na pia kupitia nyimbo.
- *Tumia muda kwa ajili ya kuungama,* ukihakikisha kwamba hakuna kinachomzuia Mungu kusikia maombi yako. Wapatie watu muda wa maungamo binafsi na weka muda wa kuungama kwa pamoja. Hamasisha watu kuungama dhambi za binafsi wakiwa pekee yao na kuungama dhambi za wazi kwa uwazi. Katika Danieli 9:1-19 tunasoma kumhusu Danieli, aliyeomba na kuungama kwa wazi dhambi za watu wa Mungu.
- *Ombea mahitaji ya watu walio katika mkutano huo wa maombi.* Watu wengi wanaumia au wana uhitaji wa maombi, au wanamfahamu mtu mwenye uhitaji wa maombi. Tengeneza duara, weka kiti katikati, na alika wale wenye maombi maalumu waje mmoja baada ya mwingine na kushiriki maombi yao. Kisha kusanyikeni kumzunguka mtu huyu na waruhusu watu wawili au watatu kuomba kwa ajili ya mahitaji mahususi ya mtu huyu na kudai ahadi za Mungu.

- *Gawa kikundi katika vikundi viwili vidogo.* Waruhusu wanawake kuomba katika chumba kimoja (wakiwa na kiongozi wa kike) na wanaume katika chumba kingine (wakiwa na kiongozi wa kiume). Mahitaji mengi binafsi hayawezi na hayapaswi kushirikishwa na kila mtu. Ni rahisi zaidi kushiriki pamoja na wale wa jinsia moja.
- *Baada ya kurudi pamoja, ombea mahitaji ya jamii na kanisa lenu.* Pia tumia muda kwa ajili ya **maombi ya kanisa la kiulimwengu** (yaliyoorodheshwa katika ukurasa wa maombi ya kanisa la kiulimwengu). Siyo lazima kumaliza orodha nzima ya maombi, kwa hiyo usiharakishe ukiwa na hisia za kutaka kumaliza orodha yote. Unaweza kugawa maombi katika vikundi vidogo vidogo na kuwapatia kila kikundi sehemu ya orodha hiyo.
- *Ombea orodha ya watu watano hadi saba* uliokuwa ukiwaombea katika siku hizi kumi
- *Chagua kifungu cha Biblia na kuombea.*
- *Funga muda wa maombi kwa kipindi kingine cha kusifu na kushukuru.*

Changamoto za Kuwafikia watu walio nje Ndani ya Siku Kumi za Maombi

Yesu hatuiti kwa ajili ya kuomba tu bali anaita pia ili kuhudumia mahitaji ya wale wanaotuzunguka. “Kwa maana nalikuwa na njaa, mkanipa chakula; nalikuwa na kiu, mkaninywesha; nalikuwa mgeni, mkanikaribisha; nalikuwa uchi, mkanivika nalikuwa mgonjwa, mkaja kunitazama; nalikuwa kifungoni, mkanijia” (Mathayo 25:35, 36).

Katika kitabu cha *Huduma ya Uponyaji (The Ministry of Healing)* tunasoma kuwa, “Tunapaswa kuishi maisha yenye sura mbili – maisha ya mawazo na matendo, na maisha ya maombi ya kimya na kazi inayofanywa kwa juhudi” (uk. 512). Tumepokea upendo mwingi sana kutoka kwa Mwokozi wetu; na tuna fursa ya kushiriki upendo huo na marafiki, majirani, hata watu tusiowafahamu wenye uhitaji.

Muulize Mungu katika maombi namna bora ya kuwafikia wengine katika Siku hizi Kumi za Maombi. Unapokuwa ukifanya kazi ya kupanga kila kitu, epuka kuruhusu shughuli hizo kukufanya ushindwe kuomba. “Jitihada binafsi kwa ajili ya wengine zinapaswa kwanza kutanguliwa na maombi mengi ya faragha; kwani hekima kubwa inahitajika ili kuelewa sayansi ya kuokoa roho. Kabla ya kuwasiliana na watu, wasiliana na Kristo. Pata maandalizi ya kuhudumia watu kutoka katika kiti cha enzi cha neema ya kimbingu.” (*Maombi*, uk. 313).

Hapa kuna baadhi ya njia unazoweza kutumia kusaidia wengine. Chagua njia yo yote utakayoona inakidhi mahitaji ya wale unaokwenda kuwahudumia, na jisikie huru kuongeza mawazo yako.

- Mpikie mgonjwa chakula.
- Mkaribishe jirani/mfanyakazi mwenzako kwenye kusanyiko la kijamii.
- Mpatie chakula mtu asiye na makazi.
- Tafuta mzee mmoja. Mtembelee kila siku na umsaidie kazi, kama vile kumnunulia mahitaji, kumpikia, au kumsaidia kazi za bustani, n.k.
- Oka mkate na ushiriki huo mkate na jirani.
- Saidia kwenye miradi katika maeneo yanayokuzunguka.
- Jitolee kukaa na mgonjwa au mtu asiyejiweza ili wale wanaomhudumia waweze kufanya shughuli zingine.
- Jitambulishe kwa jirani mpya aliyehamia maeneo yenu na kumpelekea chakula. Mfanye ajisikie kukaribishwa katika maeneo hayo.
- Nunua mahitaji ya jikoni na upelekee familia yenye uhitaji.

- Toa msaada miwani yako ya zamani.
- Jitolee kutoa masomo ya Biblia
- Tembelea sehemu za kutunzia watu wenye uhitaji na kuwafariji.
- Mpatie mwanafunzi fedha ya “chakula.”
- Kusanya nguo kwa ajili ya wahitaji. Unaweza kuanzisha kabati la nguo kanisani kwako kwa ajili ya kushiriki na wale walio na uhitaji.
- Toa msaada kompyuta yako au vifaa vingine vya kielektroniki usivyotumia.
- Toa msaada gari lako lililotumika.
- Andaa “Tamasha la Kupima Afya.”
- Tuma kadi kwa mtu aliyefungiwa ndani.
- Andaa mfululizo wa mambo ya uinjilisti.
- Mpatie mtu kitabu unachodhani angekipenda.
- Wapigie simu jirani zako na kuwajulia hali.
- Gawa vijarida na vijuzuu kwa watu. Vinapatiakana kwenye tovuti ifuatayo hapa: www.glowonline.org/glow
- Mwalike mtu kumpokea Yesu.
- Endesha darasa la mapishi.
- Fanya “Mradi wa machapisho 28.” Katika Juma la kwanza, gawa kitabu kimoja. Juma la pili, gawa vitabu viwili. Juma la tatu, gawa vitabu vitatu. Endelea hadi utakapogawa vitabu vyote 28.
- Mpelekee chakula mtu aliyepoteza (aliye fiwa na) mpendwa wake.
- Mtembelee mtu hospitali ili kumtia moyo au kumsaidia kwa namna moja au nyingine.
- Msomee mzee kitabu.
- Tembelea makazi ya watoto yatima pampja na wanaoishi katika mazingira magumu na toa msaada kwa wafanyakazi wa hapo.
- Anza kundi la kushona/kufuma ili kutengeneza nguo kwa ajili ya wahitaji.
- Msomee Biblia kwa sauti mtu asiyeona au asiyeweza kusoma.
- Endesha usiku wa vijana nyumbani kwako.
- Toa makazi kwa watu walionyanyaswa.
- Gawa baadhi ya vitabu kwenye makazi ya watoto.
- Panga na kusimamia siku ya kufurahi kwa ajili ya watoto na wenye mahitaji maalumu pamoja na familia zao.
- Andaa siku ya kufanya usafi katika jamii.
- Anzisha chama cha afya katika kanisa lako. Alika marafiki na majirani.

- Muulize mtu kama angependa kuungana na wewe kutazama mkanda wenye ujumbe wa kiroho. Kadiri mnavyotazama pamoja, omba kwamba Roho Mtakatifu anene na moyo wa mtu huyo.
- Buni mradi wako mwenyewe.

Kwa vitendea kazi zaidi juu ya ushuhudiaji, tembelea tovuti ifuatayao:

www.revivalandreformation.org/resources/witnessing.

Ahadi za Biblia za Kudai kwenye Maombi

Ahadi za Roho Mtakatifu

“Mwombeni Bwana mvua wakati wa masika, naam, Bwana afanyaye umeme, naye atawapa manyunyu ya mvua, kila mtu atapewa nyasi kondeni.” Zakaria 10:1

“Basi, ikiwa ninyi mlio waovu mnajua kuwapa watoto wenu vipawa vyema, je! Baba aliye mbinguni hatazidi sana kuwapa Roho Mtakatifu hao wamwombao?” Luka 11:13

“Lakini huyo Msaidizi, huyo Roho Mtakatifu, ambaye Baba atampeleka kwa jina langu, atawafundisha yote, na kuwakumbusha yote niliyowaambia... Naye akiisha kuja, huyo atauhakikisha ulimwengu kwa habari ya dhambi, na haki, na hukumu.” Yohana 14:26; 16:8

“Amin, amin, nawaambieni, Yeye aniaminiye mimi, kazi nizifanyazo mimi, yeye naye atazifanya; naam, na kubwa kuliko hizo atafanya, kwa kuwa mimi naenda kwa Baba. Nanyi mkiomba lo lote kwa jina langu, hilo nitalifanya, ili Baba atukuzwe ndani ya Mwana. Mkiniomba neno lo lote kwa jina langu, nitalifanya.” Yohana 14:12 - 14

“Akajibu akaniambia, akisema, Hili ndilo neno la Bwana kwa Zerubabeli, kusema, Si kwa uwezo, wala si kwa nguvu, bali ni kwa roho yangu, asema Bwana wa majeshi.” Zakaria 4:6

Ahadi kwamba Mungu Hujibu Maombi

“Ninyi mkikaa ndani yangu, na maneno yangu yakikaa ndani yenu, ombeni mtakalo lote nanyi mtatendewa.” Yohana 15:7

“Basi na tukikaribie kiti cha neema kwa ujasiri, ili tupewe rehema, na kupata neema ya kutusaidia wakati wa mahitaji.” Waebrania 4:16

“Kwa sababu hiyo nawaambia, Yo yote myaombayo mkisali, aminini ya kwamba mnayapokea, nayo yatakuwa yenu.” Marko 11:24

“Ukaniite siku ya mateso; Nitakuokoa, na wewe utanitukuza.” Zaburi 50:15

“Tena nawaambia, ya kwamba wawili wenu watakapopatana duniani katika jambo lo lote watakaloliomba, watafanyiwa na Baba yangu aliye mbinguni.” Mathayo 18:19

“Na yo yote mtakayoyaomba katika sala mkiamini, mtapokea.” Mathayo 21:22

“Nanyi mkiomba lo lote kwa jina langu, hilo nitalifanya, ili Baba atukuzwe ndani ya Mwana. Mkiniomba neno lo lote kwa jina langu, nitalifanya.” Yohana 14:13, 14

“Tena siku ile hamtaniuliza neno lo lote. Amin, amin, nawaambia, Mkimwomba Baba neno lo lote atawapa kwa jina langu. Hata sasa hamkuomba neno kwa jina langu; ombeni, nanyi mtapata; furaha yenu iwe timilifu.” Yohana 16:23, 24

“Na huu ndio ujasiri tulio nao kwake, ya kuwa, tukiomba kitu sawasawa na mapenzi yake, atusikia. Na kama tukijua kwamba atusikia, tuombacho chote, twajua kwamba tunazo zile haja tulizomwomba.” 1 Yohana 5:14, 15

Ahadi kuhusu Nguvu ya Mungu

“Kuna neno gani lililo gumu la kumshinda Bwana? Kwa muhula wake nitakurudia, wakati huu huu mwakani, na Sara atapata mwana wa kiume.” Mwanzo 18:14

“Bwana atawapigania ninyi, nanyi mtanyamaza kimya.” Kutoka 14:14

“Yesu akawakazia macho, akasema, Kwa wanadamu haiwezekani, bali kwa Mungu sivyo; maana yote yawezekana kwa Mungu.” Marko 10:27

“Yeye ni mwaminifu ambaye awaita, naye atafanya.” 1 Wathesalonike 5:24

“Najua ya kuwa waweza kufanya mambo yote, Na ya kuwa makusudi yako hayawezi kuzuilika.” Ayubu 42:2

“Basi, tuseme nini juu ya hayo? Mungu akiwapo upande wetu, ni nani aliye juu yetu? Yeye asiyemwachilia Mwana wake mwenyewe, bali alimtoa kwa ajili yetu sisi sote, atakosaje kutukirimia na mambo yote pamoja naye?” Warumi 8:31, 32

“Mungu si mtu, aseme uongo; Wala si mwanadamu, ajute; Iwapo amesema, hatalitenda? Iwapo amenena, hatalifikiliza?” Hesabu 23:19

“Je! Wewe hukujua? Hukusikia? Yeye Mungu wa milele, Bwana, Muumba miisho ya dunia, hazimii, wala hachoki; akili zake hazichunguziki. Huwapa nguvu wazimiao, humwongezea nguvu yeye asiyekuwa na uwezo. Hata vijana watazimia na kuchoka, na wanaume vijana wataanguka; bali wao wamngojeao Bwana watapata nguvu mpya; watapanda juu kwa mbawa kama tai; watapiga mbio, wala hawatachoka; watakwenda kwa miguu, wala hawatazimia.” Isaya 40:28 – 31

Ahadi za Uongozi wa Mungu

“Je! Si mimi niliyekuamuru? Uwe hodari na moyo wa ushujaa; usiogope wala usifadhaike; kwa kuwa Bwana, Mungu wako, yu pamoja nawe kila uendako.” Yoshua 1:9

“Na tazama, mimi nipo pamoja nawe, nitakulinda kila uendako, nami nitakuleta tena mpaka nchi hii, kwa maana sitakuacha, hata nitakapokufanyia hayo niliyokuambia.” Mwanzo 28:15

“Tazama, mimi namtuma malaika aende mbele yako, ili akulinde njiani na kukupeleka mpaka mahali pale nilipokutengezea.” Kutoka 23:20

“Lakini huko, kama mkimtafuta Bwana, Mungu wako, utampata, ukimtafuta kwa moyo wako wote, na roho yako yote.” Torati 4:29

“Niite, nami nitakuitikia, nami nitakuonyesha mambo makubwa, magumu usiyoyajua.” Yeremia 33:3

“Kila bonde litainuliwa, Na kila mlima na kilima kitashushwa; Palipopotoka patakuwa pamenyoka, Na palipoparuza patasawazishwa; Na utukufu wa Bwana utafunuliwa, Na wote wenye mwili watauona pamoja; Kwa kuwa kinywa cha Bwana kimenena haya.” Isaya 40:4, 5

“Nitakufundisha na kukuonyesha njia utakayoiendea; Nitakushauri, jicho langu likikutazama.” Zaburi 32:8

“Naye Bwana, yeye ndiye atakayekutangulia, atakuwa pamoja nawe, hatakupungukia wala kukuacha; usiogope wala usifadhaike.” Torati 31:8

“Ni nani amchaye Bwana? Atamfundisha katika njia anayoichagua.” Zaburi 25:12

“Mtumaini Bwana kwa moyo wako wote, Wala usizitegemee akili zako mwenyewe; Katika njia zako zote mkiri yeye, Naye atayanyosha mapito yako.” Mithali 3:5, 6

“Na kama ukimkunjulia mtu mwenye njaa nafsi yako, na kuishibisha nafsi iliyoteswa; ndipo nuru yako itakapopambazuka gizani; na kiwi chako kitakuwa kama adhuhuri. Naye Bwana atakuongoza daima, ataishibisha nafsi yako mahali pasipokuwa na maji, na kuitia nguvu mifupa yako; nawe utakuwa kama bustani iliyotiwa maji, na kama chemchemi ambayo maji yake hayapungui.” Isaya 58:10, 11

“Nao watatoka nje na kuitazama mizoga ya watu walioniasi; maana funza wao hatakufa, wala moto wao hautazimika nao watakuwa chukizo machoni pa wote wenye mwili.” Isaya 65:24

Ahadi za Moyo Uliobadilishwa

“Nami nitawapa moyo, wanijue ya kuwa mimi ni Bwana; nao watakuwa watu wangu, nami nitakuwa Mungu wao; kwa maana watanirudia kwa moyo wao wote.” Yeremia 24:7

“Bwana, Mungu wako, atautahiri moyo wako, na moyo wa uzao wako, ili umpende Bwana, Mungu wako, kwa moyo wako wote, na kwa roho yako yote, upate kuwa hai.” Torati 30:6

“Nami nitawapa ninyi moyo mpya, nami nitatia roho mpya ndani yenu, nami nitatoa moyo wa jiwe uliomo ndani ya mwili wenu, nami nitawapa moyo wa nyama.” Ezeieli 36:26

“Nami niliaminilo ndilo hili, ya kwamba yeye aliyeanza kazi njema mioyoni mwenu ataimaliza hata siku ya Kristo Yesu;” Wafilipi 1:6

“Hata imekuwa, mtu akiwa ndani ya Kristo amekuwa kiumbe kipya; ya kale yamepita tazama! Yamekuwa mapya.” 1 Wakorintho 5:17

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.” Wagalatia 2:20

“Mungu wa amani mwenyewe awatakase kabisa; nanyi nafsi zenu na roho zenu na miili yenu mhifadhiwe mwe kamili, bila lawama, wakati wa kuja kwake Bwana wetu Yesu Kristo. Yeye ni mwaminifu ambaye awaita, naye atafanya.” 1 Wathesalonike 5:23, 24

Ahadi za Msamaha

“Ikiwa watu wangu, walioitwa kwa jina langu, watajinyenyekesha, na kuomba, na kunitafuta uso, na kuziacha njia zao mbaya; basi, nitasikia toka mbinguni, na kuwasamehe dhambi yao, na kuiponya nchi yao.” 1 Nyakati 7:14

“Kwa maana Wewe, Bwana, U mwema, Umekuwa tayari kusamehe, Na mwingi wa fadhili, Kwa watu wote wakuitao.” Zaburi 86:5

“Nanyi, kila msimamapo na kusali, sameheni, mkiwa na neno juu ya mtu; ili na Baba yenu aliye mbinguni awasamehe na ninyi makosa yenu.” Marko 11:25

“Tena iweni wafadhili ninyi kwa ninyi, wenye huruma, mkasameheane kama na Mungu katika Kristo alivyowasamehe ninyi.” Waefeso 4:32

“Tukiziungama dhambi zetu, Yeye ni mwaminifu na wa haki hata atuondolee dhambi zetu, na kutusafisha na udhalimu wote.” 1 Yohana 1:9

“Haya, njoni, tusemezane, asema Bwana. Dhambi zenu zijapokuwa nyekundu sana, zitakuwa nyeupe kama theluji; zijapokuwa nyekundu kama bendera, zitakuwa kama sufu.” Isaya 1:18

“Mimi, naam, mimi, ndimi niyafutaye makosa yako kwa ajili yangu mwenyewe, wala sitazikumbuka dhambi zako.” Isaya 43:25

“Maana nitausamehe uovu wao, wala dhambi yao sitaikumbuka tena.” Yeremia 31:34

“Katika yeye huyo, kwa damu yake, tunao ukombozi wetu, masamaha ya dhambi, sawasawa na wingi wa neema yake.” Waefeso 1:7

Ahadi za Ushidi Dhidi ya Dhambi

“Kwa maana kila kitu kilichozaliwa na Mungu huushinda ulimwengu; na huku ndiko kushinda kuushindako ulimwengu, hiyo imani yetu.” 1 Yohana 5:4

“Lakini katika mambo hayo yote tunashinda, na zaidi ya kushinda, kwa yeye aliyetupenda.” Warumi 8:37

“Lakini Mungu na ashukuriwe atupaye kushinda kwa Bwana wetu Yesu Kristo.” 1 Wakorintho 15:57

“Usiogope, kwa maana mimi ni pamoja nawe; usifadhaike, kwa maana mimi ni Mungu wako; nitakutia nguvu, naam, nitakusaidia, naam, nitakushika kwa mkono wa kuume wa haki yangu.” Isaya 41:10

“Zaidi ya yote mkiitwaa ngao ya imani, ambayo kwa hiyo mtaweza kuizima mishale yote yenye moto ya yule mwovu.” Waefeso 6:16

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.” Wagalatia 2:20

“Kwa maana ndiye Mungu atendaye kazi ndani yenu, kutaka kwenu na kutenda kwenu, kwa kulitimiza kusudi lake jema.” Wafilipi 2:13

“Basi nasema, Enendeni kwa Roho, wala hamtazitimiza kamwe tamaa za mwili.” Wagalatia 5:16

“Naye Mungu wa amani atamseta Shetani chini ya miguu yenu upesi. Neema ya Bwana wetu Yesu Kristo na iwe pamoja nanyi. Amina.” Warumi 16:20

“Wala msiifuatishe namna ya dunia hii; bali mgeuzwe kwa kufanywa upya nia zenu, mpate kujua hakika mapenzi ya Mungu yaliyo mema, ya kumpendeza, na ukamilifu.” Warumi 12:2

“Msiipende dunia, wala mambo yaliyomo katika dunia. Mtu akiipenda dunia, kumpenda Baba hakumo ndani yake.” 1 Yohana 2:15

Ahadi za Uponyaji

“Akawaambia, Kwamba utaisikiza kwa bidii sauti ya Bwana, Mungu wako, na kuyafanya yaliyoelekea mbele zake, na kutega masikio usikie maagizo yake, na kuzishika

amri zake, mimi sitatia juu yako maradhi yo yote niliyowatia Wamisri; kwa kuwa Mimi ndimi Bwana nikuponyaye." Kutoka 15:20

"Makomeo yako yatakuwa ya chuma na shaba; Na kadiri ya siku zako ndivyo zitakavyokuwa nguvu zako." Torati 33:25

"Ee nafsi yangu, umhimidi Bwana, Wala usizisahau fadhili zake zote. Akusamehe maovu yako yote, Akuponya magonjwa yako yote, Aukomboa uhai wako na kaburi, Akutia taji ya fadhili na rehema, Aushibisha mema uzee wako, Ujana wako ukarejzwa kama tai." Zaburi 103:2 - 5

"Usiwe mwenye hekima machoni pako; Mche Bwana, ukajiepushe na uovu. Itakuwa afya mwilini pako, Na mafuta mifupani mwako." Mithali 3:7, 8

"Alidharauliwa na kukataliwa na watu; Mtu wa huzuni nyingi, ajuaye sikitiko; Na kama mtu ambaye watu humficha nyuso zao, Alidharauliwa wala hatukumhesabu kuwa kitu. Hakika ameyachukua masikitiko yetu, Amejitwika huzuni zetu; Lakini tulimdhania ya kuwa amepigwa, Amepigwa na Mungu, na kuteswa. Bali alijeruhiwa kwa makosa yetu, Alichubuliwa kwa maovu yetu; Adhabu ya amani yetu ilikuwa juu yake, Na kwa kupigwa kwake sisi tumepona." Isaya 53:3-5

"Uniponye, Ee Bwana, nami nitaponyeka; uniokoe, nami nitaokoka; kwa maana wewe ndiwe uliye sifa zangu." Yeremia 17:14

"Maana nitakurudishia afya, nami nitakuponya jeraha zako, asema Bwana, kwa sababu wamekuita, mwenye kutupwa, wakisema, Ni Sayuni, ambao hapana mtu autakaye." Yeremia 30:17

"Tazama, nitauletea afya na kupona, nami nitawaponya; nami nitawafunulia wingi wa amani na kweli." Yeremia 33:6

"Lakini kwenu ninyi mnaolicha jina langu, jua la haki litawazukia, lenye kuponya katika mbawa zake; nanyi mtatoka nje, na kucheza-cheza kama ndama wa mazizini." Malaki 4:2

"Mtu wa kwenu amekuwa hawezi? Na awaite wazee wa kanisa; nao wamwombee, na kumpaka mafuta kwa jina la Bwana. Na kule kuomba kwa imani kutamwoko mgonjwa yule, na Bwana atamwinua; hata ikiwa amefanya dhambi, atasamehewa." Yakobo 5:14, 15

Ahadi kwa ajili ya Nguvu za Kufanya Mapenzi ya Mungu

"Kwa hiyo hatulegei; bali ijapokuwa utu wetu wa nje unachakaa, lakini utu wetu wa ndani unafanywa upya siku kwa siku. Maana dhiki yetu nyepesi, iliyo ya muda wa kitambo tu, yatufanyia utukufu wa milele uzidio kuwa mwingi sana; tusiviangalie

vinavyoonekana, bali visivyoonekana. Kwa maana vinavyoonekana ni vya muda tu; bali visivyoonekana ni vya milele." 2 Wakorintho 4:16-18

"Tena tusichoke katika kutenda mema; maana tutavuna kwa wakati wake, tusipozimia roho." Wagalatia 6:9

"Nayaweza mambo yote katika yeye anitiaye nguvu." Wafilipi 4:13

"Kwa maana ndiye Mungu atendaye kazi ndani yenu, kutaka kwenu na kutenda kwenu, kwa kulitimiza kusudi lake jema." Wafilipi 2:13

"Naye akaniambia, Neema yangu yakutosha; maana uweza wangu hutimilika katika udhaifu. Basi nitajisifia udhaifu wangu kwa furaha nyingi, ili uweza wa Kristo ukae juu yangu." 2 Wakorintho 12:9

Ahadi Kuhusu Kuwa Mashahidi wa Mungu

"Msiogope wala msifanye hofu; je! Sikukuhubiri haya zamani na kuyaonyesha? Na ninyi ni mashahidi wangu. Je! Yuko Mungu zaidi yangu mimi? Hakika hapana Mwamba; mimi sijui mwingine." Isaya 44:8

"Ondoka, uangaze; kwa kuwa nuru yako imekuja, Na utukufu wa Bwana umekuzukia." Isaya 60:1

"Lakini vyote pia vyatokana na Mungu, aliyetupatanisha sisi na nafsi yake kwa Kristo, naye alitupa huduma ya upatanisho." 2 Wakorintho 5:18

"Lakini Bwana akaniambia, Usiseme, Mimi ni mtoto; maana utakwenda kwa kila mtu nitakayekutuma kwake, nawe utasema kila neno nitakalokuamuru." Yeremia 1:7

"Lakini mtapokea nguvu, akiisha kuwajilia juu yenu Roho Mtakatifu; nanyi mtakuwa mashahidi wangu katika Yerusalemu, na katika Uyahudi wote, na Samaria, na hata mwisho wa nchi." Matendo 1:8

"Bali ninyi ni mzao mteule, ukuhani wa kifalme, taifa takatifu, watu wa milki ya Mungu, mpate kuzitangaza fadhili zake yeye aliyewaita mtoke gizani mkaingie katika nuru yake ya ajabu." 1 Petro 2:9

"Mwe tayari siku zote kumjibu kila mtu awaulizaye habari za tumaini lililo ndani yenu; lakini kwa upole na kwa hofu." 1 Petro 3:15

Sherehe ya Siku ya Sabato

Andaa Sabato ya Mwisho ya Siku Kumi za Maombi kwa namna ya kusherehekea wema wa Mungu na nguvu yake kuu. Shiriki namna ulivyopata uzoefu wa kumwagwa kwa Roho Mtakatifu katika siku hizi kumi zilizopita. Sherehekea mambo yale Mungu aliyotenda, anayotenda, na atakayotenda.

Mahitaji ya kila kusanyiko yanatofautiana, hivyo tafadhali fanya kazi pamoja na viongozi wa kanisa mahalia ili kuandaa mpango mahususi kwa ajili ya kanisa lako. Hapa kuna baadhi ya mambo ya kujumuisha katika ibada ya kanisa lako katika Sabato ya Mwisho.

Wazo Kuu:

Kurejea Madhabahuni – Kuandaa mahali kwa ajili ya Mungu

Fungu Elekezi:

“Lakini saa inakuja, nayo sasa ipo, ambayo waabuduo halisi watamwabudu Baba katika roho na kweli. Kwa maana Baba awatafuta watu kama hao wamwabudu” (Yohana 4:23).

Mapendekezo ya Nyimbo

Saa Heri ya Maombi, No. 135

Nipe Biblia, No. 52

Kaa Nami, N0. 91

Mtazame Mwokozi, No. 212

Mapendekezo ya Hubiri

Mruhusu mchungaji, mzee wa kanisa, au kiongozi wa maombi kuhubiri somo fupi kuhusu umuhimu wa maombi binafsi ya mara kwa mara na ibada za familia. Kifungu cha Maandiko: Yohana 4:23.

[AU]

Wapatie nafasi washiriki wa Siku Kumi za Maombi kupokezana katika kutoa muhtasari kwa dakika 1 au 2 wa kila mwongozo wa maombi wa siku 10. Shiriki kichwa cha somo, fungu elekezi, na wazo kuu. (Andaa mapema ili muhtasari uwe ndani ya dakika 1-2. Kwa watu wengi, dakika moja ni maneno 125-150 yanayozungumzwa).

[AU]

Andaa watu watatu wa umri tofauti ili kutoa wasilisho fupi la dakika kama tano hivi kuhusu jinsi wanavyofanya maombi binafsi. Kwa kuongeza, andaa familia moja au mbili

ziweze kushiriki mawazo ya jinsi ya kuwezesha uzoefu wa kuhusianisha katika ibada za familia. Vijana wanaweza pia kusaidia kwa muziki au kutoa shuhuda.

Hitimisha kwa wito kwa wasikilizaji kufanya maombi binafsi na ibada za familia kuwa kipaumbele.

Mawazo mengine ya Programu:

Shuhuda za washiriki juu ya maombi yaliyojibiwa

Muda wa maombi ya vikundi vidogo

Matangazo ya maombi na shughuli zijazo za huduma

Kisa cha watoto kuhusu maombi

Chaguzi za nyimbo maalumu

Mahitaji ya Kuombea kwa Kanisa la Kiulimwengu

1. Bwana, hebu ruhusu ule uamsho wa kale wa uungu ufunike kanisa lako katika siku hizi za mwisho. Tuwezeshe kusimamia ukweli hata kama mbingu zingeanguka.
2. Tunaomba kwa ajili ya uhuru wa dini, na haki ya dhamiri ulimwenguni kote. Bwana, tunaomba ufungue milango ili Neno lako lipate kutangazwa.
3. Bwana, tunaomba kanisa lako ulimwenguni liitikie wito wa kutangaza ujumbe wa malaika watatu kwa mapana yake kwa kila taifa, lugha, na jamaa. Onesha jinsi ya kujenga mafundisho yote haya katika upendo na haki ya Kristo.
4. Bwana, wezesha Waadventista wa Sabato wote ulimwenguni kutamka kuwa “Nitakwenda” na kuitikia wito wa kukutumikia na kutangaza habari njema ya wokovu.
5. Tunaomba utupatie hekima ya kuchunguza, kuelewa na kuifuata Biblia Takatifu ya Mungu. Tufundishe kutenga maneno ya ukweli na uaminifu ili kushiriki na wengine.
6. Bwana, tunaomba uamshe upya hali ya kuthamini maagizo kutoka mbinguni yanayopatikana katika maandiko yaliyovuviwa ya Ellen G. White.
7. Tunaomba utumwagie mvua ya masika ya Roho Mtakatifu ili kuleta nguvu katika ushuhuda wetu itakayotwezesha kumaliza kazi tuliyopewa na Mungu ili kufanya kabla ya kuja mara ya pili kwa Yesu Kristo.
8. Bwana, tunaomba upanyaji wako na rehema katika maeneo yaliyoathirika sana kwa janga hili la UVIKO-19
9. Tunawaombea wataalam wa tiba, wanasayansi, viongozi wa serikali, na maafisa wa afya ya jamii wajaliwe hekima kwa maamuzi mengi magumu wanayalazimika kufanya.
10. Tunaomba kwamba Waadventista wa Sabato wote ulimwenguni wawe tayari kusaidia na kutia moyo wale wote wanaopitia katika adha ya maumivu. Tupatie ujasiri, ubunifu, na roho isiyo na ubinafsi pale majirani wetu wanapokuwa wakituhitaji sana.
11. Tunawaombea wale wote waliathirika kifedha kwa sababu ya kupoteza ajira kufuatia tamko la kuzuiwa majumbani.
12. Bwana, tunaomba uwaoneshe waumini makanisani namna ya kuwasaidia wale ambao wanapambana na matatizo ya afya ya akili huku wakitengwa.

13. Tunawaombea wachungaji pamoja na makanisa kupata namna ya kuwezesha waumini kubakia katika muunganiko wakati huu wa kuzuiliwa majumbani. Bwana, tafadhali leta pamoja kanisa lako katika huduma na ibada.
14. Tunaomba kwa ajili ya uamsho wa kiroho kati ya vijana wa kanisa la Waadventista wa Sabato wanaohudhuria katika vyuo vikuu na taasisi zingine za elimu ulimwenguni kote. Tunaomba Bwana uwafanye kuwa mabalozi wakereketwa wa Kristo.
15. Tunaombea asilimia 69 ya watu ulimwenguni ambao hawajapokea mawasilisho yasiyochafuliwa ya Yesu.
16. Tunaombea watu milioni 62 katika miji 28 ambayo haijafikiwa au imefikiwa kwa uchache katika nchi ya Urusi (Divisheni ya Euro-Asia.)
17. Tunaomba Mungu ainue wamisionari jasiri walio tayari kufanya kazi kati ya makundi 746 yaliyopo katika nchi 20 za Mashariki ya kati.
18. Tunaombea wimbi kubwa la Waadventista wa Sabato watakaokuwa tayari kumtumikia Mungu kwa kuwapenda wengine na kwa kushiriki na watu kutoka katika tamaduni na dini zingine.
19. Bwana, tafadhali inua wanafunzi Wa-Aldensia ambao wako tayari kukutumikia katika maeneo magumu.
20. Tunaombea washiriki wa kanisa la Waadventista wa Sabato wanaokabiliwa na mateso na kutupwa gerezani kwa ajili ya Imani yao.
21. Tunaomba kwa ajili ya watu milioni 202 waliopo katika miji 41 iliyofikiwa kwa uchache katika Divisheni ya Asia Pacific kusini wapate kumfahamu Yesu.
22. Tunaomba kwa ajili ya Idara ya Shule ya Sabato na Huduma Binafsi ya kila kanisa mahalia kadiri wanavyotafuta mpango wa Mungu na kuwafikia walio nje katika jamii kwa huduma za upendo, mafunzo ya Biblia, na ushuhuda binafsi.
23. Tunaomba kwa ajili ya shirika la misaada la Waadventista wa Sabato (ADRA) kadiri wanavyokabiliana na mahitaji ya watu ulimwenguni kote.
24. Tunawaombea watu milioni 16 katika miji 6 ambayo imefikiwa kwa uchache sana katika divisheni ya Pacific ya kusini.
25. Tunaomba kuwa Roho Mtakatifu atusaidie kufahamu jinsi ya kufikia watu milioni 406 katika miji 105 ya divisheni ya Asia Pacific ya kaskazini ambayo haijafikiwa au imefikiwa kwa uchache sana.
26. Bwana, tunaomba ubariki Huduma ya Uchaplensia ya kanisa la Waadventista wa Sabato iweze kuhamasisha wahudumu pamoja na waumini wenye shauku ya kuhudumia watu waliopo magerezani.
27. Ee Bwana, tunaombea waalimu wa Shule ya Sabato. Wasaidie kufahamu umuhimu wa kazi yao kwa watoto wetu.

28. Bwana, tunaomba uongozi kwa vituo vingi vya mvuto, programu za afya na familia, pamoja na klabu za Watafutanzia ulimwenguni kote.
29. Tunaomba kwamba utusaidie kupenda, kulea, na kufanya wanafunzi wale washiriki wapya na wageni wanaohudhuria kanisani.
30. Bwana, tunaomba utuoneshe jinsi ya kupeleka machapisho yaliyojawa na kweli kwa jamii zetu. Tunaomba kwamba uwajalie kuyasoma na kwamba Roho Mtakatifu alete ushawishi katika ukweli wa Biblia.
31. Bwana, tunaomba ulinzi wako kwa wamisionari wanaofanya kazi katika maeneo hatarishi
32. Tunakuomba uinue wainjilisti wa vitabu, wanafunzi wa kujitolea, waandishi, wataalam wa mitandao ya kijamii, pamoja na wafadhili watakaosaidia kueneza maneno ya matumaini na uzima.
33. Tunaomba kwa ajili ya shule za kanisa la Waadventista wa Sabato, wanafunzi, pamoja na waalimu ulimwenguni kote. Hebu shule hizi zifundishe kwa uaminifu kweli za Biblia na kuwaongoza vijana katika utume, huduma na kushiriki uhusiano na Kristo.
34. Bwana, tupatie hekima ya kufikia tamaduni zingine ambazo hazina shauku ya dini. Hebu Roho wako Mtakatifu aangushe kuta ambazo zinazunguka roho hizo.
35. Tunakuomba utubariki kadiri tunawavyofikia watu waliofungwa katika ibada ya mizimu, ibada ya sanamu, na imani za kinyama. Tusaidie kuelewa mtazamo wao wa kidunia na kuwatambulisha kwa Mwokozi wao binafsi.
36. Bwana, tunakuomba ulete uvuvio kwa kanisa la Waadventista wa Sabato ulimwenguni kote wapate kuomba kwa namna ambayo hawajawahi kuomba. Tufundishe kudai ahadi zako na kutazamia kwamba utahamisha milima zaidi tunapomba.
37. Tunaomba kwa ajili ya makundi 514 ya watu katika nchi 18 za divisheni ya Afrika India Kusini. Tafadhali waongoze katika ukweli wa Biblia.
38. Tunakuomba utuoneshe jinsi ya kupata mahitaji ya kiroho ya wakimbizi. Hebu kanisa letu lifahamike kwa upendo wetu kwa watu wote, bila kujali kuwa ni akina nani au wanatoka wapi.
39. Tunakuomba uinue wamisionari wa mijini wapate kuanzisha makanisa kwa makundi 806 ya watu katika nchi 20 za divisheni ya Ulaya.
40. Tunakuomba uinue jeshi la watendakazi watakaoanzisha makanisa kati ya makundi 948 ya watu katika nchi 38 za divisheni ya Amerika (Inter-America Division)
41. Bwana, tunakuomba uandae vijana watakaojikusha katika kuanzisha makanisa kati ya makundi 788 ya watu katika nchi 9 za divisheni ya Amerika kaskazini.

42. Tunakuomba uandae watu wa kujitolea ili kuhudumia makundi 70 ya watu katika Field ya Israeli.
43. Tunakuomba uinue wamisionari matabibu ili kuanzisha makanisa kati ya makundi 830 ya watu katika nchi 11 za divisheni ya Afrika ya Mashariki na Kati.
44. Tunakuomba uinue mashujaa wa maombi wapate kuombea makundi 2,568 ya watu katika nchi 4 za divisheni ya Asia kusini.
45. Tafadhali wezesha familia zetu kudhihirisha upendo wako majumbani mwetu na katika jamii zinazotuzunguka. Tunaomba uleta upatanifu majumbani, ponya mahusiano yaliyovunjika, linda wahanga wa unyanyasaji, na dhihirisha uwezo wako utakasao katika hali zinazoonekana kutokuwa na matumaini.
46. Tunakuomba uinue wauguzi na madaktari wa kuanzisha makanisa mapya kati ya makundi 1,978 ya watu katika nchi 22 za divisheni ya Afrika ya kati.
47. Tunaomba kwa ajili ya watu milioni 49 katika miji 19 ambayo hijafikiwa au imefikiwa kwa uchache sana katika divisheni ya Trans Europe
48. Tunaomba kwa ajili ya Watoto wetu, tafadhali wawezeshe kusimama kwa ujasiri kukutetea wanapokabiliana na vikwazo na misukumo. Wasaidie kufanya chaguzi sahihi na kusimamia ukweli.
49. Tunaomba utufundishe kufuata mfano wa Yesu usiokuwa na ubinafsi kwa kukabiliana na mahitaji ya kila siku ya watu wanaotuzunguka. Tuwezeshe kuhudumu kama wamisionari matabibu, watu wanaojitolea katika jamii, na marafiki wa watu wenye uhitaji.
50. Tunaombea viongozi wa vijana ulimwenguni kote ambao ni waaminifu katika kupatia vizazi vinavyofuata urithi wa utambulisho wa Kristo, utume wa kanisa la Waadventista wa Sabato, na uongozi katika makanisa mahalia.
51. Tunaomba kwa ajili ya vijana wetu wanaoishi katika hali hatarishi kwa ajili ya Bwana kupitia katika program ya OYIM na Mission Caleb.
52. Tunaombea washiriki wa kanisa la Waadventista wa Sabato, wachungaji, na viongozi ulimwenguni kote wapate kujilisha katika Neno la Mungu kila siku. Utuwezeshe kukutafuta katika maombi kila siku. Tukumbushe kwamba, bila wewe hatuwezi kufanya lolote.

Siku kumi za Maombi 2023
www.tendaysofprayer.org

Kurejea Madhabahuni – Kuomba kwa Ajili ya Moyo Uliounganishwa Upya

Siku ya Kwanza

Uko wapi?

Fungu Elekezi: *“Bwana Mungu akamwita Adamu, akamwambia, Uko wapi?”* Mwanzo 3:9

Swali Muhimu Zaidi

Je, kuna swali la kutafuta zaidi kuliko lile ambalo Mungu alimuuliza moja kwa moja Adamu baada ya kuanguka? Ni kweli, Mungu alifahamu kwa hakika mahali Adamu na Hawa walipokuwa. Hata hivyo, Yeye ni mwenye maarifa – anajua yote, hivyo Mungu hasa alikuwa akimuuliza, Adamu, *je*, unafahamu ulipo? Adamu na Hawa walikuwa wameacha kumtii Mungu (Mwanzo 3, 4), na kukosa utii kwao kulitengeneza ufa, ufa katika kile ambacho mwanzo kilikuwa ni uhusiano mkamilifu kati ya Mungu na uumbaji wake. Sehemu ambapo Mungu alikuwa akikutana nao siku zote zilizopita ilikuwa tupu siku hii. Sura za kwanza kuwahi kuumbwa, siku ile hazikuwa na tabasamu kwa Muumbaji wao. Mikono aliyoitengeneza kutoka katika udongo haikumkumbatia siku ile. Mioyo ambayo kudunda kwake mara nyingi kuliwiana na moyo wake ilikuwa mbali kwa namna ya ajabu, karibia kuwa kimya kabisa siku ile.

Haitoshi

Ellen White anasema, “Shetani aliwasilisha kwa wanandoa wale watakatifu dhana ya kwamba wangufaika kwa kuvunja sheria ya Mungu. Je, hatusikii mawazo yanayofanana na haya leo?” (*Patriarchs and Prophets*, uk. 54). Adamu na Hawa walifanya kosa la kumsikiliza shetani, na aliwashawishi kwamba kile Mungu alichowapatia hakikuwa kinasosha, kwamba ushirika na Mungu katika uhusiano wa karibu, na wenye kuaminiana haukutosha. Ghafla nchi tulivu ya Eden sasa “ilionekana kuwaogopesha wale wanandoa wenye hatia. Upendo na Amani iliyokuwa yao ilikuwa imetoweka, na badala yake walipata hisia za dhambi, hofu ya wakati ujao, utupu wa nafsi. Vazi la nuru lililokuwa limewafunika lilitoweka, na ili kuziba nafasi yake walijaribu kujitengeneza cha kujifunikia; kwani katika hali ile ya kuwa uchi, wasingeweza kukutana na jicho la Mungu na malaika watakatifu” (uk. 57). Dhambi ilikuwa imebadilisha hali ya kiroho ya viumbe pekee katika Eden ambao Mungu alikuwa ameshiriki nao mfano wake halisi. Kwa hakika, iliharibu sura ya Mungu ndani yao.

Muda wa Kuomba

Tangu Adamu na Hawa walipovunja uhusiano wao na Mungu, hadi wingi wa mahusiano ya sasa tunayoshuhudia yaliyovunjika, yamechorwa katika nyuso za watu ulimwenguni, pengine hakuna kingine cha muhimu zaidi cha kuomba kuliko kurejea mahali pale Mungu anapotusubiria. Milenia zinaweza kuwa zimepita, lakini udanganyifu uliomwangusha Adamu na Hawa haujabadilika. Shetani bado anadai kwamba kuna kitu Mungu anatumficha, kwamba Mungu hawezi kuaminiwa, kwamba Mungu hatoshi. Ujumbe huu unatawala zaidi katika kizazi cha kidijitali kilichojikita katika teknolojia, ambapo vifaa vingi na muunganiko mwingi huahidi aina ya furaha ya kiroho, hali ya juu zaidi ambapo sisi wenyewe tunaongoza hatima yetu badala ya kumsujudia Mungu aliyetuumba. Huu ndio wakati wa kukataa udanganyifu wa Shetani na kurejea kwa Yule anayetupenda kwa upendo wa milele, kurudi kwa Yule anayetuvuta kwake kwa Kamba za upendo (Yeremia 31:3)!

Tuombe pamoja...

Wakati wa Maombi (Dakika 30-45)

Ahadi Yenye Nguvu

“Ni jambo zuri kwamba tunaweza kuomba na kupata tunachokiomba; kwamba viumbe wasiostahili, waliopotoka wana nguvu ya kuwasilisha mahitaji yao kwa Mungu, ni nguvu gani ya juu zaidi mwanadamu angeweza kuitamani kuliko hii – kuunganishwa na Mungu wa milele? Mwanadamu dhafu, mwenye dhambi ana fursa ya kuzungumza na Muumba wake. Tunaweza kutamka maneno yanayofika katika kiti cha enzi cha Mtawala wa ulimwengu. Tunaweza kuzungumza na Yesu kadiri tunavyotembea njiani, naye anasema, Mimi ni mkono wako wa kuume” (Ellen G. White, *Prayer*, uk. 7)

Vikundi vyote vya maombi vina namna tofauti ya kuomba pamoja. Tunawahimiza kutumia dakika 30-45 zinazofuata katika maombi ya pamoja kwa namna yoyote ile ambayo Roho Mtakatifu ataongoza. Hapa chini pana mfano wa jinsi ya kuomba kupitia kwa Maandiko. Unaweza kuomba kupitia katika aya nyingine za Maandiko pia. Tazama Mwongozo wa Kiongozi kwa ajili ya mawazo mengine ya maombi.

Kuomba Kupitia katika Neno la Mungu – Yeremia 24:7

“Nami nitawapa moyo, wanijue ya kuwa mimi ni Bwana; nao watakuwa watu wangu, nami nitakuwa Mungu wao; kwa maana watanirudia kwa moyo wao wote.”

“Nitakuwa Mungu wao”

Mungu, asante kwa kuja kututafuta wakati sisi tumefanya mambo yaliyoharibu uhusiano wetu na wewe. Asante kwa kutupenda kwa upendo unaodumu milele na kwa kutuvuta kwako kila mara,

na kwa namna ya waziwazi kila dakika ya kila siku. Asante, Mungu, kwa upendo ambao bado huwatafuta wenye dhambi! Amina.

“Kwa Mioyo Yao Yote”

Mpendwa Yesu, tunakushukuru kwa ahadi ya moyo uliombwa upya, moyo unaomtafuta Mungu na kumsubiri katika nyakati za uhitaji na nyakati za kujawa. Tunakuomba utimize ahadi yako ya moyo mpya wenye upendo mpya kwako. Amina.

“Watakuwa Watu Wangu”

Mungu, akili zetu zinastaajabu kwamba unaweza kudai kuwa sisi ni wako baada ya sisi kukuacha. Asante kwa kutufunika kwa maisha makamilifu ya Yesu Kristo na kutupatia jina jipya (Ufunuo 2:17). Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Saa Heri ya Maombi (#135)

Hivi Nilivyo Nitwae (#140)

Yesu Kwetu ni Rafiki (#130)

Karibu Sana (#33)

Siku kumi za Maombi 2023

www.tendaysofprayer.org

Kurejea Madhabahuni – Sehemu ya Kukumbuka

Siku ya Pili

Kuweka Wakfu na Ukumbusho

Fungu Elekezi: *“Naye huko akamjengea madhabahu Bwana aliyemtokea.”* Mwanzo 12:7

Kuweka Wakfu na Ukumbusho

Katika Biblia, madhabahu daima huwakilisha sehemu za kuweka wakfu na ukumbusho. Ni ishara ya nje ya uhusiano binafsi wa mtu na Mungu, ishara ya ukubali wa mtu na kumwabudu Mungu wa kweli na aliye hai. Madhabahu mara nyingi zilijengwa ili kufanya ukumbusho wa kukutana na Mungu, ukumbusho ulikokuwa na matokeo makubwa katika maisha ya mtu. Mungu alipofanya kitu “kisicho cha kawaida,” “kisicho cha kibinadamu,” au “cha pekee sana,” wapokeaji wa kitendo kikuu cha Mungu hawakutaka kusahau, hivyo wangejenga madhabahu – sehemu ya kukumbuka – katika eneo walipomuona Mungu akitenda.

Mungu alipomwambia Abramam katika Mwanzo 12:7 kwamba angewapatia wazao wake nchi ya Kaanani, Abramam alijenga madhabahu pale kwa sababu namna waliyokutana na Mungu haikuwa ya “kwa kawaida.” Wakati ule Mungu aliahidi kutenda kwa namna isiyo ya kawaida katika maisha ya Abramam na kutoa katika uzao wake taifa kubwa na lenye nguvu. “Mimi ni Mungu wa Ibrahimu baba yako, usiogope, maana mimi ni pamoja nawe, nami nitakubarikia, na kuzidisha uzao wako” (Mwanzo 26:24). Isaka alifanya kumbukizi ya mkutano huu wa kimbangu kwa kujenga madhabahu katika sehemu ile ile kwa sababu yeye pia alikutana na Mungu kwa namna “isiyokuwa ya kibinadamu.” Mungu alikuwa amevuka kaida ya asili katika maisha ya Isaka ili kuthibitisha kwamba ahadi yake kwa baba yake Isaka sasa ilikuwa ni ahadi ya Isaka pia. Yakobo, kijana wa Isaka, alisafiri kwenda mahali palipoitwa Betheli (Mwanzo 35:3) na akajenga madhabahu kwa kumheshimu Mungu, aliyemtokea wakati akimkimbia Esau. Kwa sababu kukutana kule na Mungu kulikuwa “kwa pekee sana,” Yakobo alijenga madhabahu pale. Gideoni mwenye hofu alishangazwa sana Mungu alipomtokea kwa Amani na kumuita kuongoza taifa katika ushindi. Gideoni aliguswa sana kiasi cha kujenga madhabahu katika sehemu ile na kuiita “Jehova ni Amani” (Waamuzi 6:24) kwa sababu kukutana kwake na Mungu kulikuwa kwa “Amani sana!”

Kamwe Usisahau

Pamoja na kwamba wengi huona matendo makuu ya Mungu katika maisha yao kama nyakati tu za bahati, wengine hutambua kutenda kwa Mungu na hufanya yote yaliyo katika uwezo wao ili kamwe wasisahau kile alichofanya. Kuna faida ya ziada pia kwa jitihada zao: wasafiri wa siku za usoni katika safari ya maisha wanabarikiwa kwa madhabahu zilizotengenezwa na waamini. Ellen White anaandika kwamba, “Ibrahimu alitupatia mfano wa thamani. Alikuwa ni maisha ya maombi. Popote alipoweka hema yake, aliweka pia madhabahu karibu yake, akiwaita wote katika kambi yake kwa kafara za asubuhi na jioni. Hema yake ilipoondolewa, madhabahu ilibaki. Wakaanani waliokuwa wakizurura walipokea maagizo kutoka kwa Ibrahimu, na wakati wowote mmoja wao alipokutana na madhabahu ile, alimwabudu Mungu aliye hai pale” (*Fron Eternity Past*, uk. 76).

Ni mibaraka gani ya kimbingu unataka kuikumbuka siku za usoni? Na ni madhabahu gani utamjengea Mungu leo?

Tuzungumze na Mungu wetu.

Wakati wa Maombi (Dakika 30-45)**Kuomba Kupitia katika Neno la Mungu – Mwanzo 12:7**

“...Naye huko akamjengea madhabahu Bwana aliyemtokea.”

“Alijenga Madhabahu”

Mungu, siku hii ya leo ninataka kukumbuka kile ulichotenda katika maisha yangu, jinsi ulivyoingilia kati nilipokuwa katika njia isiyo sahihi, jinsi ulivyoniokoa. Ninataka kukumbuka na kukusifu kwa neema yako ya upendo kwangu. Ninakumbuka wema wako, na kama muitikio kwa hilo nitatoa (upya) maisha yangu kwako. Amina.

“Kwa Bwana”

Bwana Mungu, Wewe pekee ndiye unayestahili sifa zetu, ibada zetu, na kujitoa kwetu. Hakuna Mungu mwingine kama Wewe: mwenye upendo mwingi sana, wema mwingi sana, uvumilivu mwingi sana, rehema nyingi sana, nguvu nyingi sana, na aliye tayari kuokoa na kusaidia.

“Watakuwa Watu Wangu”

Mungu, akili zetu zinastaajabu kwamba unaweza kudai sisi ni wako baada ya sisi kukuacha. Asante kwa kutufunika kwa maisha makamilifu ya Yesu Kristo na kutupatia jina jipya (Ufunuo 2:17). Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Saa Heri ya Maombi (#135)

Hivi Nilivyo Nitwae (#140)

Yesu Kwetu ni Rafiki (#130)

Karibu Sana (#33)

Siku kumi za Maombi 2023

www.tendaysofprayer.org

Kurejea Madhabahuni – Mahadhi ya Maisha

Siku ya Tatu

Asubuhi na Jioni

Fungu Elekezi: *“Nao wasimame kila asubuhi kumshukuru na kumsifu Bwana, na jioni vivyo hivyo.”* 1 Nyakati 23:30

Maisha na Mungu

Sura ya 1 Nyakati 23 hudhihirisha kwamba Mungu aliwaagiza Walawi – wale waliotunza hekalu la kale la Kiyahudi na huduma zake – kusimama katika uwepo wake wakiinua sauti zao katika kushukuru na kumsifu kila asubuhi na jioni. Zoezi hili la ibada chimbuko lake ni katika amri nyingine ambayo Mungu alimpatia Musa alipowaagiza Waisraeli akisema “wanifanyie patakatifu; ili nipate kukaa kati yao” (Kutoka 25:8). Mungu aliagiza zaidi kuwa, “Mwana-kondoo mmoja utamchinja asubuhi; na mwana-kondoo wa pili utamchinja jioni” (Kutoka 29:39).

Maisha Katikati

Maisha ya Waisraeli yalikusudiwa waweze kuishi kati ya mambo mawili ya kufanyika kila siku, ambayo ni uzoefu wa misingi ya kiroho. Watu wa Mungu walipaswa kuanza na kumaliza siku yao pamoja naye. Hawakupaswa kamwe kudharau neema yake iokoayo. Walihitaji nguvu ya Mungu iwalinde dhidi ya hatari za nje kadiri walivyosafiri nyikani wakielekea katika Nchi ya Ahadi. Walihitaji kulindwa dhidi ya vishawishi vitokavyo ndani – shauku ya kutumia vigezo vya Kimisri na mambo ya kiroho ya Kimisri na mitazamo ya Kimisri waliyokuwa wamejifunza wakiwa utumwani. Kafara za asubuhi na jioni zilikuwa ni namna ya Mungu ya kujenga mpangilio wa kufuatwa na watu na familia za Kiisraeli, namna ya kuwadumisha katika uhusiano sahihi na Yeye. Hapa kuna namna ambavyo Ellen White anaelezea uzoefu huu mtakatifu, wa dhati na wa kila siku:

“Kadiri makuhani walivyoingia patakatifu kila asubuhi na jioni wakati wa kufukiza, kafara ya kila siku ilikuwa tayari kutolewa kwenye madhabahu katika ua wa ndani. Huu ulikuwa wakati wa shauku kubwa kwa waabudu waliokusanyika katika hekalu. Kabla ya kuingia katika uwepo wa Mungu kupitia utumishi wa makuhani, walipaswa kujihusisha katika kuchunguza mioyo yao kwa dhati na kuungama dhambi. Waliungana katika ombi la kimya, nyuso zao zikielekea katika patakatifu. Hivyo maombi yao yalipanda kwa wingu la uvumba, wakati Imani yao ikishikilia kustahili

kwa Mwokozi aliyeahidiwa akibainishwa na kafara ya upatanisho. Saa zilizochaguliwa kwa ajili ya kafara ya asubuhi na jioni zilitambulika kama saa takatifu, na baadaye zilitambulika kama muda uliotengwa kwa ibada katika taifa lote la Kiyahudi. Na nyakati kadhaa baadaye Wayahudi wakiwa wametawanyika kama mateka katika nchi za mbali, bado katika saa zile ziliyotengwa walielekeza nyuso zao Yerusalemu na kuomba kwa Mungu wa Israeli. Kwa desturi hii Wakristo wana mfano wa maombi ya asubuhi na jioni. Wakati Mungu akilaani kaida tupu, zisizo na roho ya ibada, huwatazama kwa shauku kubwa wale wanaompenda, wakisujudu asubuhi na jioni ili kutafuta msamaha kwa dhambi walizotenda na kuwasilisha maombi yao kwa mibaraka inayohitajika." (*Patriachs and Prophets*, uk. 353, 354)

Ikiwa maisha yako ya maombi yamepoteza mahadhi yake, mwombe Mungu sasa aweze kufanya upya msimamo wako kwa ibada ya asubuhi na jioni leo.

Tuzungumze na Mungu wetu.

Wakati wa Maombi (Dakika 30-45)

Kuomba Kupitia katika Neno la Mungu - 1 Nyakati 23:30

"Nao wasimame kila asubuhi kumshukuru na kumsifu Bwana, na jioni vivyo hivyo."

"Kila Asubuhi"

Yesu, tunataka kuanza siku zetu pamoja Nawe. Tafadhali tuamshe ili tuweze kufurahia ushirika katika uwepo wako. Tusaidia kufanya hili kuwa tabia ya kila siku na siyo kuharakisha au kuacha. Tusaidie kukufanya kuwa wa kwanza na mtangulizi katika mawazo yetu kila siku. Amina.

"Kumshukuru na Kumsifu Bwana"

Baba, sisi ni wepesi kukuletea mahitaji, malalamiko, matamano yetu mbalimbali, na nyakati fulani tunasahau kwamba Wewe siyo mashine ya kutolea vitu. Tukumbushe kuhusu vipengele vyote vya tabia yako, mambo yote madogo na makubwa uliyotenda na unayotutendea, ili tuweze kukushukuru na kukusifu kwa ajili ya hayo. Sasa, elekeza fikira zetu zikusifu. Amina.

"Na Jioni Vivyo Hivyo"

Mungu, tunatamani siyo tu kuanza siku na wewe bali pia kuimaliza pamoja na wewe. Kadiri tunavyojielekeza katika saa ulizotupatia, tunaomba utukumbushe nyakati nyingi tulipoona uaminifu wako siku nzima. Hebu tulale tukiwa na sifa vinywani mwetu, kwani wewe ni Mwokozi wetu wa milele. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Yote Namtolea Yesu (#122)

Uniongoze Jehova (#156)

Karibu Sana (#33)

Magharibi ni Jua (#92)

Siku kumi za Maombi 2023

www.tendaysofprayer.org

Kurejea Madhabahuni – Jenga Upya na Atakuja – Tena!

Siku ya Nne

Kinachomrudisha Mungu

Fungu Elekezi: *“Watu wote wakamkaribia. Akaitengeneza madhabahu ya Bwana iliyovunjika.”*

1 Wafalme 18:30

Mvua Zilipokoma

Hali ya hewa siku ile ilichangamka, japo kulikuwa na hali isiyo ya kawaida ya ukimya uliotawala Mlima Karmeli. Nyakati zilizopita mlima huu ulikuwa mzuri, wa kijani na wenye kusitawi sana. Ulipata mvua ya kutosha na kutambulika kama mahali patakatifu, sehemu ya mibaraka na uzao (Ellen G. White, *Prophets and Kings*, uk. 144). Lakini yote hayo yalikuwa yamebadilika. Kile kilichokuwa kijani sasa kilikuwa kimeungua na kuisha, matokeo ya ukame wa kuumiza, wa miaka mitatu na nusu (1 Wafalme 17:1; 18:1; Yakobo 5:17). Hapa kuna namna Ellen White anavyoelezea Israeli ilivyokuwa wakati huo:

Dunia inakaushwa kama vile imekaushwa na moto. Joto la jua linaloungua hugaribu uoto wa asili mchache uliosalia. Vijito vinakauka, kondoo na ng’ombe wanatangatanga huku na kule kwa wasiwasi. Mashamba yaliyokuwa yamenawiri hapo awali yamekuwa kama mchanga wa jangwa unaoungua, uchafu uliotelekezwa... Miji na vijiji vilivyoshamiri hapo awali vimekuwa sehemu za maombolezo. Njaa na kiu vinapeleka kwa mwanadamu ujumbe hatarishi wa kufisha. Janga la njaa pamoja na utisho wake wote, linazidi kusogea karibu na karibu zaidi. (*Prophets and Kings*, uk. 124, 125)

Ukame Ndani

Pengine ukame wa kiroho ulioacha mioyo ya watu wa Mungu ikiwa na kiu na kukosa imani ulizidi ukame wa kimwili uliolikumba taifa. Israeli ilikuwa ikitawaliwa na Mfalme Ahabu aliyekuwa mwovu, na mke wake Yezebeli. Huyu binti Msidoni wa Ahabu alisaidia kuhafifisha utii wake kwa Mungu. Ni katika uasi huu wa kiroho ndipo Mungu alipomuita nabii Eliya. Ellen White anaandika hivi kuhusu Eliya, “Katika siku za Ahabu kulikuwa na mtu wa Imani na maombi ambaye huduma yake isiyo na woga ilikusudiwa kurekebisha uasi uliosambaa kwa kasi katika Israeli” (*Prophets and Kings*, uk. 119).

Eliya Anajenga Upya Madhabahu

Baada ya manabii wa Baali na Ashera kushindwa kufanya miungu yao itume moto, ulikuwa ni “wakati wa matoleo ya kafara ya jioni” (1 Wafalme 18:36) ndipo Eliya alipoita watu karibu na kumjengea upya madhabahu iliyokuwa imevunjika Mungu wa kweli. Katika hali halisi kabisa, Eliya hakuwa tu akiita taifa Kurejea katika madhabahu ya ibada ya kweli; badala yake, alikuwa akiita taifa Kurejea katika madhabahu ya ibada za *mara kwa mara, zenye mpangilio* wa Mungu wa kweli! Madhabahu ya ibada ya pamoja ya Israeli ilikuwa imevunjwa, lakini madhabahu binafsi na za familia za Israeli zilikuwa zimevunjika muda mrefu uliopita.

Kinachomrudisha Mungu

Ilikuwa ni urejeshwaji wa ibada ya kweli, ya moyoni, ndiyo iliyomgusa Mungu kuitikia pale Karmeli. Kitendo cha kwanza cha Eliya cha uamsho wa kiroho wa kitaifa kilikuwa ni kujenga upya madhabahu iliyovunjika. Ikiwa madhabahu yako binafsi au ya familia imevunjika, ijenge upya, na uruhusu moto wa uwepo wa Mungu uweze kuwafunika wote waliokusanyika ili kumwabudu!

Tuzungumze na Mungu wetu

Wakati wa Maombi (Dakika 30-45)

Kuomba Kupitia katika Neno la Mungu – 1 Wafalme 18:30

“Watu wote wakamkaribia. Akaitengeneza madhabahu ya Bwana iliyovunjika.”

“Watu Wote Wakamkaribia”

Ee Yesu, yule aliyesadikisha mioyo ya Waisraeli katika Mlima Karmeli wakati Eliya alipokuwa akijenga upya madhabahu alikuwa Roho wako Mtakatifu. Kwa namna hiyo hiyo, tunaomba usadikishe mioyo yetu leo. Tuonyeshe dhambi zetu, ili tuweze kutafuta msamaha na neema ya kushinda ndani ya Yesu. Tuvute karibu na Wewe, dhahirisha uzuri wa utakatifu wako ndani ya mioyo yetu, na utupaatie shauku ya kukutamani kuliko tulivyowahi kutamani hapo kabla. Amina.

“Akatengeneza Madhabahu ya Bwana”

Baba yetu, tuna hatia ya kupuuza muda wa kila siku pamoja nawe – maombi ya mara kwa mara – iwe binafsi au kama familia. Tupatie moyo mpya, akili mpya, na tuongoze kuanzisha upya nyakati za ibada na maombi pamoja nawe mara kwa mara. Tusaidie kukusudia na kuwa na mpangilio. Imarisha Imani yetu ili tuweze kuiishi dini ya kweli kupitia uwepo wako ndani yetu. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Nijaze Sasa (#40)

Taamini Nitii Pia (#128)

Yesu Uje Kwetu (#13)

Bwana Ninakuhitaji (#16)

Siku kumi za Maombi 2023

www.tendaysofprayer.org

Kurejea Madhabahuni – Nitakutafuta Mapema

Siku ya Tano

Yesu, Anayeamka Mapema

Fungu Elekezi: *“Lakini saa inakuja, nayo sasa ipo, ambayo waabuduo halisi watamwabudu Baba katika roho na kweli. Kwa maana Baba awatafuta watu kama hao wamwabudu.”* Yohana 4:23

Ukweli wa Madhabahu

Kuna “ukweli wa madhabahu” katika maisha ya Yesu ambao hakuna Mkristo anapaswa kuukosa. Katika siku chache zilizopita tumetafakari sana juu ya madhabahu katika Maandiko na katika maisha ya wale waliozijinga. Madhabahu ni sitiari ya mahali na muda wa ibada kwa Mungu wa kweli na aliye hai. Mtu hahitaji kuwa na madhabahu halisi aweze kumwabudu Mungu. Kwa kweli, ikiwa mfuasi wa Yesu anaishi maisha yenye msimamo, ya dhati, na ushirika pamoja na Mungu uliotawaliwa na Biblia, tayari mtu huyo ameshajenga madhabahu halisi kama ile ambayo Eliya alijenga katika Mlima Karmel (1 Wafalme 18).

Tunaona “madhabahu” kama hiyo katika maisha ya Yesu. Katikati ya maisha yenye mambo mengi ya utume wa kila siku, vitisho vya kila siku, mashambulizi ya kuhafifisha kutoka kwa ibilisi, Yesu alitenga muda kwa ajili ya vipindi virefu vya maombi na ibada. Yeye aliyekuwa sawa na Baba (Wafilipi 2:6) bado alifikiri kwamba kulikuwa na umuhimu wa “kutulia na kufahamu” kwamba Mungu ni Mungu (Zaburi 46:10). Yesu alielewa tangu katika umri wa awali kwamba wito wake ulihitaji muunganiko wa kudumu na Baba yake. Hii ndiyo iliyokuwa njia pekee ya kubeba dhambi za dunia msalabani.

Watafutaji wa Awali Wanahitajika

Katika Marko 1:35 Yesu aliamka “alfajiri na mapema sana” na kutafuta sehemu yenye utulivu, iliyojitenga ili kuzungumza – na kumsikiliza – baba yake. Siku nzima iliyopita ilikuwa imetumika katika utume – kuponya wagonjwa, kutoa pepo, na kuwakomboa waliopotea. Mitume walipoamka, waligundua kwamba Yesu hakuwepo na hivyo wakatoka ili kumtafuta. “Nao walipomwona wakamwambia, ‘Watu wote wanakutafuta’” (Marko 1:37). Jibu la Yesu ni ukumbusho wenye nguvu wa mbaraka unaowasubiria wale wote wanaohudhuria katika madhabahu zao asubuhi na jioni.

Akawaambia, “Twendeni mahali pengine, mpaka vijiji vilivyo karibu, nipate kuhubiri huko nako; maana kwa hiyo nalitokea” (Marko 1:38). Umeona hilo? Yesu alikabiliwa na mtanziko mkubwa. Kubaki pale alipokuwapo – yaani nyumbani kwa Petro – na kuendelea pale na utume wenye matunda. Au, kuondoka mahali pale na kuelekea katika himaya mpya, ambazo hazijafikiwa kiutume. Ni Wakristo wachache leo watakaoweza kuacha utume wenye matunda na wakati unaoonekana mzuri, kwa ajili ya utume wa muda kitambo usiofahamika. Lakini, Yesu alifanya hivyo bila kusita. Ni kwa namna gani alifanya chaguzi sahihi? Mungu Baba alikuwa amedhihirishia mipango ya siku hiyo katika wakati wa muda wake binafsi wa maombi. Baba alithibitisha kusudi la Yesu kadiri alivyoomba na kusubiri katika uwepo wake.

Rafiki zangu, tunaposhindwa kumtafuta Mungu mapema katika ibada na maombi, tunashindwa kutambua mipango ya Mungu kwa ajili ya siku yetu na uthibitisho wake kwa kusudi letu. Tumuombe Mungu leo kwa ajili ya kujitoa kuamka mapema na kutumia muda na Mungu ili aweze kutuandaa kutimiza kusudi lake kwa siku yetu na maisha yetu.

Tuzungumze na Mungu wetu

Wakati wa Maombi (Dakika 30-45)

Kuomba Kupitia katika Neno la Mungu – Yohana 4:23

“Lakini saa inakuja, nayo sasa ipo, ambayo waabuduo halisi watamwabudu Baba katika roho na kweli. Kwa maana Baba awatafuta watu kama hao wamwabudu.”

“Waabuduo Halisi”

Baba, tufundishe jinsi ya kukuabudu katika shughuli zetu za kila siku, katika vipengele vyote muhimu na vya kawaida vya maisha yetu. Tunaomba tusiitenganishe Imani yetu tena, tusiifikirie ibada kama tukio tu la Sabato, lakini tuione kwa uhakika kama njia bora ya maisha. Tunaomba tuendelee kuunganika na Wewe na kuishi kama waabuduo halisi wa Mungu pekee wa kweli. Amina.

“Wamtamwabudu Bwana katika Roho na Kweli”

Asante, Mungu, kwamba tunaweza kukuabudu kutokea popote tulipo na wakati wowote tunapohitaji. Unatusikia iwe tupo nyumbani, kazini, kanisani, au safarini. Tunakusifu kwa kupatikana huku kwa saa 24 kila siku kwa watoto wako. Bwana, tuongoze katika kweli yote kupitia katika Roho wako Mtakatifu ili ibada yetu, naam, maisha yetu, yaweze kuwa katika uwiano na kweli yote. Asante, Mungu, kwa kutuongoza kuelekea katika uzoefu wa ibada ya kweli. Amina.

“Baba Anawatafuta Watu kama Hao”

Baba mwenye rehema, upendo wako kwetu unapita fahamu zote. Unatamani sisi tuwe karibu na wewe. Unatutafuta kwa bidii na una shauku ya kuwa kila kitu kwetu. Tusamehe pale tulipokupuuza na kutokutumia muda mwingi, au kutokutumia kabisa muda na wewe kila siku. Tunafahamu kwamba hujilazimishii kwetu. Asante kwa uhakika kwamba ikiwa tutakualika kuwa na ushirika nasi, utakuwa katikati yetu. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Mwokozi Kama Mchungu (#18)

Twapanda Mapema (#55)

Ni Wako Bwana (#144)

Tumaini Liko (#162)

Siku kumi za Maombi 2023
www.tendaysofprayer.org

Kurejea Madhabahuni – Kuhitimisha Siku na Mungu

Siku ya Sita

Shujaa wa Maombi ya Usiku Kucha

Fungu Elekezi: *“Ikawa siku zile aliondoka akaenda mlimani ili kuomba, akakesha usiku kucha katika kumwomba Mungu.”* Luka 6:12

Mfano kwa ajili Yetu

Yesu alitambulika kutumia usiku kucha katika maombi, kama alivyofanya katika usiku ule kabla ya kuchagua timu ya mitume 12 ambao siku moja wangeipeleka injili duniani (Luka 6:12, 13). Ungeweza kulazimika pia kukesha usiku kucha kama ungepaswa kuokoa dunia nzima ukiwa na msaada wa wenye dhambi 12 wasio na vigezo. Jukumu hilo lilikuwa zito sana. Hapa kuna jinsi Ellen White anavyomwelezea Yesu, Shujaa wa Maombi ya usiku kucha:

Mfalme wa mbinguni, wakati akiwa katika huduma yake duniani, aliomba sana kwa Baba Yake. Alisujudu mara nyingi kwa maombi usiku kucha. Roho yake mara nyingi ilikuwa na huzuni kadiri alipohisi nguvu za giza za dunia hii, na akaondoka katika mji ulio na shughuli nyingi na makelele, ili kutafuta sehemu iliyojitenga ili kufanya maombi yake. Mlima wa Mizeituni ulikuwa ni sehemu pendwa ya kimbilio kwa Mwana wa Mungu kwa ajili ya maombi yake. Mara nyingi baada ya umati kuachana naye kwa ajili ya pumziko la usiku, hakupumzika, japo alikuwa amechoka kwa kazi ya siku nzima... Wakati mji ukiwa na utulivu, na mitume wakiwa wamerudi majumbani mwao ili kupata burudiko la usingizi, Yesu hakulala. Maombi yake ya kimbingu yalikuwa yakipanda kwa Baba yake kutoka katika Mlima wa Mizeituni kwamba mitume wake walindwe dhidi ya mivuto ya uovu ambayo wangekutana nayo kila siku duniani, na kwamba nafsi yake iweze kuimarishwa na kuandaliwa kwa ajili ya majukumu na majaribu ya siku inayofuata. Usiku kucha, wakati wafuasi wake wakiwa wamelala, Mwalimu wao alikuwa akiomba ... Kielelezo chake hicho kimeachwa kwa ajili ya wafuasi wake. (*Homeward Bound*, uk. 169).

Kuelewa Hatari

Wakati baadhi ya Wakristo wakianza siku yao na Mungu, kwa sababu ya hofu kwa sehemu fulani, ya kile kinachowasubiri pindi watakapotoka nyumbani, ni mara chache sana wengi humaliza siku yao katika uwepo wake. Wakiwa wamepokea kile walichohitaji kupata katika siku nzima, mara chache hutulia na kumshukuru Mungu kwa majaliwa na ulinzi wake katika maisha yao. Wakiwa wamechoka, wanajitupa kitandani wakiwa na wazo dogo sana la kumtafuta kwa ajili ya nguvu ya kukabili majaribu ya siku inayofuata. Ni mara chache sana humshukuru Mungu.

Yesu alielewa uhalisia wa kiroho wenye hatari uliomkaribisha kila siku. Alikuwa na uelewa mkubwa wa hatari ya kiroho ambayo wafuasi wake waliikabili, hata wakati wao hawakufahamu lolote (Luka 22:32). Leo - na kila siku - hebu tusikose fursa yoyote ya kumaliza siku yetu kwa mioyo iliyo inuliwa kwa Mungu katika maombi na sifa. Tuombeane kwa dhati ili Mungu aweze kutufanya tudumu kuwa waaminifu tunapokaribia ujio wa Yesu Kristo mara ya pili.

Tuzungumze na Mungu wetu.

Wakati wa Maombi (Dakika 30-45)

Kuomba Kupitia katika Neno la Mungu - Luka 6:12

“Ikawa siku zile aliondoka akaenda mlimani ili kuomba, akakesha usiku kucha katika kumwomba Mungu.”

“Akaenda Mlimani ili Kuomba”

Yesu, tunakushukuru sana kwa mfano wako kwetu. Maisha yako ni mpangilio mzuri tunaoufuata, na tunakuomba uishi maisha yako ndani yetu. Bwana, tunatambua hitaji letu la kuwa na muda binafsi na wewe. Tusaidie leo kutengeneza muda maalumu wa utulivu kwa ajili ya maombi. Tuonyeshe “mlima” unaopatikana kwa ajili yetu - sehemu ambapo tunaweza kuwa na ushirika na wewe na kujifunza kuisikia sauti yako kwa uwazi zaidi. Amina.

“Akakesha Usiku Kucha”

Ee Mungu, wengi wetu hatujawahi kuomba usiku kucha. Baadhi yetu tunapambana kuomba zaidi ya sekunde 30. Na wakati urefu wa maombi hautadhihirishi kama umetusikia, tunatambua kwamba matokeo ya muda mwingi pamoja nawe ni mibaraka mingi zaidi kwetu. Ni katika ushirika na wewe ndipo tunatiwa nguvu, tunasaidiwa, tunaongozwa, tunasadikishwa, na kubarikiwa. Mungu, tafadhali tufundishe kuomba na kufanya muda huu mtakatifu pamoja nawe kuwa kipaumbele, kwa mtu binafsi na kwa kanisa. Tunaomba tuweze kufikia hatua ambapo muda wetu katika maombi unakuwa mrefu zaidi kuliko muda tunaoutumia katika simu zetu, mbele ya

televisheni, au kujielekeza katika masumbufu mengine. Tufanye kuwa mashujaa wa maombi. Amina.

“Katika Kumwomba Mungu”

Mungu wetu mwenye upendo, kwa aibu tunapaswa kukiri kwamba kwa changamoto nyingi huwa hatugeukii kwanza kwako lakini tunageukia vyanzo vingine ambavyo havitoki kwako. Mara nyingi hata hatutambui kwamba tumegeuza vitu vingi na uzoefu mwingi sana kuwa miungu. Tafadhali tusamehe. Tuonyeshe pale tulipotafuta mambo ya dunia badala ya kukutafuta wewe. Wewe ndiye Mungu mkuu wa ulimwengu mwenye nguvu zote. Tunataka kukutafuta wewe tu. Tunaomba kwako tu. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Kaa Nami (#91)

Watakatifu Kesheni (#160)

Furaha Gani (#43)

Ni Salama Rohoni Mwangu (#127)

Siku kumi za Maombi 2023

www.tendaysofprayer.org

Kurejea Madhabahuni – Hitaji Letu la Muhimu Zaidi

Siku ya Saba

Kanisa Linaloabudu

Fungu Elekezi: *“Njoni, tuabudu, tusujudu, Tupige magoti mbele za Bwana aliyetuumba.”*
Zaburi 95:6

Ibada (isiyo) ya Kawaida

Utafiti wa Waadventista wa Sabato wa dunia nzima wa mwaka 2018 uligundua kwamba ni asilimia 34 tu ya nyumba za Kiadventista inayojihusisha katika ibada za kila siku za asubuhi na jioni, na asilimia 52 tu ya washiriki wa kanisa ndio wana ibada yoyote binafsi. Je, kanisa lenye ujumbe wa wakati wa mwisho uliojikita katika ibada (ujumbe wa malaika watatu wa Ufunuo 14:6-12) linaweza kuwasilisha ujumbe huu muhimu ikiwa washiriki wake hawajihusishi kwa uaminifu katika ibada binafsi na za familia? Kwa maneno mengine, tunaweza kutangaza kwa ufasaha kile ambacho wengi wetu hatufanyi kila siku?

Ellen White anasema, “Hakuna kingine zaidi kinachohitajika katika kazi [ya Mungu] kuliko matokeo ya ushirika na Mungu” (*Testimonies for the Church*, gombo la 6, uk. 47). Sehemu nyingine anaandika kuwa, “Kama wazee wa zamani, wale wanaokiri kumpenda Mungu wanapaswa kujenga madhabahu kwa Bwana popote watakapoweka kambi zao... Baba na Mama wanapaswa mara nyingi kuinua mioyo yao kwa Mungu katika maombi ya unyenyekevu kwa ajili yao na watoto wao. Hebu baba, kama kuhani wa nyumba, aweke katika madhabahu ya Mungu kafara ya asubuhi na jioni, huku mke na watoto wakiungana katika maombi na sifa. Katika nyumba kama hiyo Yesu atapenda kukaa” (*Child Guidance*, uk. 518, 519)

Hitaji Letu la Muhimu Zaidi

Kurejesha ibada binafsi na za familia kati ya Waadventista wa Sabato pengine ni hitaji kubwa zaidi kuliko yote katika wakati wetu. Lakini haitakuwa rahisi. Leo tunakabiliwa na changamoto ya teknolojia inayotawala muda wetu kwa kasi na kubadili akili zetu. Uraibu wetu kwa vyombo vya habari, hasa mitandao ya kijamii, umetuacha na wasiwasi, na kutufanya kuudhika kirahisi, kujikuta wapweke, wenye msongo, kukosa usingizi, na tusiofurahia hali yetu katika maisha.

Tofauti na hivyo, ibada binafsi na za familia zinakuwa na matokeo yaliyo kinyume. Ibada hutuliza akili zetu, hupunguza upweke, hupunguza msongo, huongeza Amani, hukamilisha mahitaji yetu ya kihisia, na kutufundisha kuridhika. Je, madhabahu inaweza kuwa tiba ya akili zetu zilizochoka na kuvurugikiwa, na mioyo yenye wasiwasi?

Mungu anatuita wakati huu kuliko wakati mwingine wowote, turudi katika moyo wake, tudumishe muda wa kujifurahisha katika uwepo wake. Hii ndiyo sababu kanisa la Waadventista wa Sabato limeanzisha mkakati wa “Kurejea Madhabahuni”, jitihada ya kujenga upya madhabahu binafsi na za familia katika kanisa la Mungu. Kufikia mwaka 2027 tunatamani kuona angalau asilimia 70 ya washiriki wa Kiadventista wanajihusisha katika ibada za binafsi na za familia za asubuhi na jioni. Utasikia zaidi kuhusu mpango huu katika siku zijazo, lakini sote tunaweza kuanza sasa kwa kumwabudu Mungu kwa uaminifu na kwa mpangilio. Ikiwa Tunarejea Madhabahuni pamoja na Mungu, tutabadilishwa na kufanana na mfano wake na kutiwa nguvu kuimaliza kazi yake!

Hebu tumuombe Mungu leo kwa ajili ya kumwagwa kwa Roho Mtakatifu kwa namna maalumu katika uzoefu wetu wa ibada pamoja nae. Wakati huu zaidi, tunahitaji mbaraka wa pekee wa kuwa na ushirika na Mungu.

Tuzungumze na Mungu wetu.

Wakati wa Maombi (Dakika 30-45)

Kuomba Kupitia katika Neno la Mungu – Luka 6:12

“Njoni, tuabudu, tusujudu, Tupige magoti mbele za Bwana aliyetuumba.”

“Njoni, Tuabudu na Tusujudu”

Ee Mungu, ni mara nyingi kiasi gani tumeshindwa kutambua jinsi ulivyo mkuu na mwema na unayepita fahamu za wanadamu. Ukubwa wa ulimwengu hauwezi kukufunika, na bado mara nyingi hatukuheshimu au kukuabudu inavyopaswa na kwa heshima kubwa. Tuonyeshe utukufu wako na tusaide tuweze kutambua jinsi unavyostahili heshima, utukufu, na sifa zote. Tukumbushe tukuaribie kwa heshima na kicho, tukikutambua kama Mungu wetu mkuu. Amina.

“Tupige Magoti Mbele za Bwana Aliyetuumba”

Ee Mungu, Muumba wa vitu vyote, wewe ndiye Mbunifu Mkuu. Vitu vyote ulivyoviumba ni vizuri na vikamilifu. Upendo wako umeandikwa katika kila jani na kila ua linalochanua. Wewe pia ni Baba yetu wa kweli, Uliyetuumba, ukatutamani, na kutufanya kwa mfano wako. Ni kwa namna gani tunaweza kutambua kikamilifu heshima uliyoweka juu yetu ya kuitwa watoto wako? Tunakusifu na kukuabudu, Muumbaji wetu! Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Nina Haja Nawe (#126)

Na Tumwabudu (#5)

Yesu Uje Kwetu (#13)

Yanipasa Kuwa naye (#154)

Siku kumi za Maombi 2023

www.tendaysofprayer.org

Kurejea Madhabahuni – Maisha ya Ibada na Ujumbe wa Wakati wa Mwisho

Siku ya Nane

Ibada na Ujumbe wa Malaika Watatu

Fungu Elekezi: *“Mcheni Mungu, na kumtukuza, kwa maana saa ya hukumu yake imekuja. Msujudieni yeye aliyezifanya mbingu na nchi na bahari na chemchemi za maji.”* Ufunuo 14:7

Ujumbe wa Malaika wa Kwanza na wa Pili

Kama Waadventista wa Sabato, tunaitwa kutangaza ujumbe wa wakati wa mwisho, wenye umuhimu mkubwa kiasi cha kutokuruhusu kitu kingine kugeuza umakini wetu (Ellen G. White, *Testimonies for the Church*, gombo la 8, uk. 302). Tunahubiri ujumbe wa malaika wa kwanza “akiruka katikati ya mbingu, mwenye Injili ya milele, awahubiri hao wakaao juu ya nchi” (Ufunuo 14:6), akiwasihi wote kumcha Mungu, kumtukuza, na “kumsujudia yeye aliyezifanya mbingu na nchi na bahari na chemchemi za maji” (fungu la 7). Mafungu haya hutukumbusha kwamba chimbuko la ubinadamu ni la kimbingu, wala siyo uibukaji. Tuna “injili ya milele” – injili ya wakati husika na isiyopimika, muhimu na ya milele, inayohitajika na isiyo na mwisho!

Pia tunashiriki ujumbe wa malaika wa pili unaopatikana katika Ufunuo 14:8: “Umeanguka Babeli!” Ujumbe huu mtakatifu unawataka wafuasi halisi wa Mungu kukataa aina zozote za ibada na imani za kibinadamu zisizojengwa katika Neno la Mungu. Hutuita tutoke katika Imani zilizokusanywa kiholela ambazo hazijajikita katika Maandiko wala hazitegemezwi na Roho ya Unabii. Malaika wa Ufunuo 18:4 anaagiza baadaye kuwa, “Toka Babeli, usishiriki dhambi zake wala usipokee mapigo yake.” Ujumbe huu mtakatifu ni wito wa kusimama pembeni katika ibada yetu ya kweli kwa Mungu!

Ujumbe wa Malaika wa Tatu

Lakini, rafiki zangu, inawezekana ujumbe wa kwanza na wa pili ulikuwa na nguvu, lakini Ellen White anasema kitu kinachoshangaza sana kuhusu ujumbe wa malaika wa tatu. Anaandika katika Barua yake ya 209 kuwa: “Nguvu ya kutangaza ujumbe wa malaika wa kwanza na wa pili inapaswa kuunganishwa katika ujumbe wa malaika wa tatu” (1899). Kwa nini? Kwa sababu ujumbe wa malaika wa tatu unagusa injili ya ujumbe wa kwanza na wito wake wa ibada! Hubeba wito wa ujumbe wa malaika wa pili wa kujitenga na ibada ya uongo. Lakini jinsi ya kutangaza ujumbe huu wa tatu si kama ule wa kwanza na wa pili kwani huu unawasilisha onyo la kutisha kuwa: “Mtu awaye yote

akimsujudu huyo mnyama na sanamu yake, na kuipokea chapa katika kipaji cha uso wake, au katika mkono wake, yeye naye atakunywa katika mvinyo ya ghadhabu ya Mungu iliotengenezwa, pasipo kuchanganywa na maji, katika kikombe cha hasira yake” (Ufunuo 14:9). Ujumbe huu unadhihirisha watu wa dunia wanaomwabudu mnyama na kupokea chapa yake na wanaomwabudu Mungu waliotiwa muhuri wa mbingu!

“Hapa ndipo penye subira ya watakatifu, hao wazishikao amri za Mungu, na imani ya Yesu” (Ufunuo 14:12). Kwa ujumbe huu Ellen White anaeleza Zaidi kuwa, “Ni ukweli wa sasa. Ujumbe huu unapaswa kwenda na nguvu kubwa iliyo tofauti kabisa. Haupaswi kufunikwa na nadharia na madanganyo ya kibinadamu” (Barua ya 20, 1900). Kadiri tunavyoomba leo, tumuombe Mungu atie nguvu ibada zetu ili tuweze kutangaza kwa nguvu ujumbe wake wa wakati wa mwisho kwa dunia inayoharibika.

Tuzungumze na Mungu wetu.

Wakati wa Maombi (Dakika 30-45)

Kuomba Kupitia katika Neno la Mungu – Luka 6:12

“Mcheni Mungu, na kumtukuza, kwa maana saa ya hukumu yake imekuja. Msjudieni yeye aliyezifanya mbingu na nchi na bahari na chemchemi za maji.”

“Mcheni Mungu na Kumtukuza”

Mungu Muumbaji wetu mkuu, Mfalme wa Ulimwengu, tunataka kujinyenyekeza katika uwepo wako. Wewe ni Mungu wetu, Mungu pekee, na unastahili sifa zetu, ibada zetu, na maisha ya kujitoa katika nia yako. Wewe ni wa ajabu, mzuri, mwenye nguvu. Tunaomba uweze kutimiza ahadi yako na kutujaza na Roho Mtakatifu ili maisha yetu yawe uakisi wa tabia yako kamilifu ya upendo. Tunaomba ujitukuze na kujidhihirisha kupitia kwetu. Amina.

“Kwa maana Saa ya Hukumu yake Imekuja”

Ee Yesu, neno la kinabii la kitabu cha Danieli na Ufunuo lipo wazi: Tunaishi katika saa ya hukumu ya historia ya dunia. Asante kwamba tuna ujasiri katika utoshelevu wa haki yako, ambayo ni yetu kwa Imani, na inayotupatia uhakika wa wokovu kadiri tunavyoikabili hukumu. Tusaidie, kwa neema yako, kuishi maisha ya huduma yenye faida, yaliyojikita katika utume, tukikuheshimu katika yote tunayotenda. Amina.

“Msjudieni Yeye Aliyezifanya Mbingu na Nchi

Ee Yesu, tunapoutazama ulimwengu huu, tunashangazwa na uzuri wa kazi za mikono yako. Licha ya madhara ya dhambi juu yake, bado tunaweza kuona kwamba wewe ndiye Mbunifu Mkuu aliyeweka uzuri mwingi katika kazi za mikono yako. Tusingekuwepo bila wewe. Asante kwa kushiriki maisha yako na kutuumba si tu tuwepo kwa ajili yetu wenyewe lakini tuishi katika ushirika wa milele pamoja na wewe, Muumbaji wetu. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Kuwatafuta (#100)

Tukimngojea (#174)

Waponyeni Wafu (#56)

Sauti Yake Mchungaji (#193)

Siku kumi za Maombi 2023

www.tendaysofprayer.org

Kurejea Madhabahuni – Ibada Hulinda Akili

Siku ya Tisa

Usipoteze Akili Yako

Fungu Elekezi: *“Linda moyo wako kuliko yote uyalindayo; Maana ndiko zitokako chemchemi za uzima.”* Mithali 4:23

Moyo wa Kitu

Moyo wa mwanadamu ambao haujaongoka ni kitu cha kutazama. Ukiangalia taarifa za habari siku hata siku, utaona wanadamu wakitenda kwa namna inayotufanya tujiulize kuhusu ubinadamu. Matendo mazuri ya upendo na wema hutokea duniani kila dakika ya siku husika, lakini hakuna shaka kwamba uovu umetawala vivyo hivyo kila mahali tunapotazama. Tunapoghubikwa na vita zisizokoma, ufisadi wa kisiasa, na ugomvi kwa kiwango kikubwa, tunapaswa pia kukubali kwamba wakati wowote matendo ya uonevu yanapotendwa, mioyo ya kibinadamu iliyovurugwa ipo kazini.

Kwa kweli, Biblia haina mema mengi ya kusema kuhusu mioyo ya wanadamu ambayo haijasalimishwa kwa Yesu Kristo. Mungu anasema, “Moyo huwa mdanganyifu kuliko vitu vyote, una ugonjwa wa kufisha; nani awezaye kuujua?” (Yeremia 17:9). Moyo ambao Mungu anauzungumzia hapa si “mashine” iliyoko ndani ya vifua vyetu bali ni “moyo wa akili” zetu – makao ya kufikiri kwetu, kiini cha ufahamu wetu na maadili, kijito ambacho kwacho shauku hutiririka. Yesu aliweka wazi zaidi alipotafakari kuwa, “Mtu mwema katika hazina njema ya moyo wake hutoa yaliyo mema, na mtu mwovu katika hazina mbovu ya moyo wake hutoa yaliyo maovu; kwa kuwa mtu, kinywa chake hunena yale yaujazayo moyo wake” (Luka 6:45).

Tunaabudu kwa Akili

Ellen White aliandika yafuatayo kuhusu umuhimu wa akili ya mwanadamu: “Akili humtawala mwanadamu. Matendo yetu yote, mema au mabaya, chanzo chake ni katika akili. Ni akili ndiyo inayomwabudu Mungu na kutuunganisha na viumbe wa kimbingu” (*Mind, Character, and Personality*, gombo la 1, uk. 72). Ni akili ndiyo Mungu anayotafuta ili kuisajili katika Pambano dhidi ya ubinafsi na uovu. Akifafanua kuhusu nguvu ya Biblia ya kuelimisha na kuimarisha akili, Ellen White anaeleza kuwa, “Hakuna kitakachoweka juhudi kubwa katika idara zote kama kuwataka wanafunzi kufahamu kweli za ajabu za ufunuo. Taratibu akili hujirekebisha kwa mambo ambayo inaruhusiwa

kufikiri" (*Testimonies for the Church*, gombo la 5, uk. 24). Ni mbaraka kiasi gani kufahamu kwamba akili zetu zinaweza kutengenezwa upya kwa Neno la Mungu linaloponya!

Linda Moyo Wako

Akili za kibinadamu zinapaswa kutunzwa, kuhudumiwa, na kulindwa, kama alivyohamasisha Sulemani katika Mithali 4:23 "Linda moyo wako kuliko yote uyalindayo; Maana ndiko zitokako chemchemi za uzima." Kwa mfano wa Mfalme Daudi, tunapaswa kumwomba Mungu atengeneze ndani yetu mioyo na akili safi (Zaburi 51:10), lakini tunapaswa kuilinda zawadi hii kwa umakini wote. Majira ya kawaida ya muda binafsi unaotumiwa katika sifa, maombi, kujifunza Biblia, na kushuhudia yatafanya mengi zaidi katika kulinda akili zetu ndani ya Kristo Yesu kuliko kitu chochote tunachoweza kufanya kila siku: "Utamlinda yeye ambaye moyo wake umekutegemea Katika amani kamilifu, kwa kuwa anakutumaini" (Isaya 26:3). Tunza akili yako, hata wakati ambapo kila mmoja anapoteza ya kwake.

Tuzungumze na Mungu wetu.

Wakati wa Maombi (Dakika 30-45)

Kuomba Kupitia katika Neno la Mungu - Mithali 4:23

"Linda moyo wako kuliko yote uyalindayo; Maana ndiko zitokako chemchemi za uzima."

"Linda Moyo Wako"

Ee Yesu, katika dunia hii ya masumbufu na mashambulizi ya mara kwa mara kutoka kwenye taarifa za habari, tunapambana kujielekeza kwako. Tunatambua utegemezi wetu kamili kwako na tunakuomba utusaidie kulinda mioyo yetu. Tusaidie kufanya chaguzi sahihi kila siku na kujiweka safi dhidi ya mashambulizi ya yule mwoovu. Amina.

"Kuliko Yote Uyalindayo"

Mwokozi wa thamani, ahsante sana kwa jinsi ulivyojitoa kwa ajili yetu. Ahsante sana kwa kudhihirisha jinsi upendo wako ulivyo wa kweli, na kujitoka kwako. Unafahamu jinsi wakati mwingine tunavyoshindwa kujitoka kikamilifu kwako na katika kazi yako. Na wakati mwingine tunaharakisha kufundisha wengine, bila kuzamisha katika mioyo yetu hayo masomo. Tusamehe kwa unafiki wetu na kutuongoza katika misha ya uadilifu na uaminifu. Amina.

"Ndiko Zitokako Chemchemi za Uzima"

Ee Mungu, mara nyingi tunasahau jinsi mioyo yetu ilivyo ya pekee, dhaiifu na ya muhimu, na hivyo hatuitendei vyema kwa kuruhusu baadhi ya mivuto katika maisha yetu. Tunaweza tusigundue jinsi mambo yote yanavyotengeneza tulivyo na tunachoamini kuhusu wewe.

Tufundishe kuwa makini na kuruhusu mivuto mitakatifu tu katika maisha yetu. Ingia ndani, Bwana, na uishi maisha yako ndani yetu. Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Tafuta Daima (#134)

Uishi Ndani yangu (#147)

Twae Wangu Uzima (#146)

Uniongoze Yehova (#156)

Siku kumi za Maombi 2023
www.tendaysofprayer.org

Kurejea Madhabahuni – Kutiwa Nguvu Kumaliza Kazi

Siku ya Kumi

Nitakwenda!

Fungu Elekezi: *“Nimtume nani, naye ni nani atakayekwenda kwa ajili yetu”? Ndipo niliposema, “Mimi hapa, nitume mimi.” Isaya 6:8*

Wanaoabudu Wanakwenda

Ni nani yuko tayari kwenda? Hilo ni swali ambalo Mungu alimuuliza Isaya alipopata njozi ibadilishayo maisha. Wakati huo ulijazwa na matokeo maalumu ya ajabu. Mungu alikuwa ameketi katika kiti cha enzi “kilicho juu sana na kuinuliwa sana” (Isaya 6:1). Nguo yake ilijaza hekalu kadiri malaika wenye mabawa sita walivyomwimbia kwa tungo tamu sana za “Mtakatifu, Mtakatifu, Mtakatifu, ni Bwana wa majeshi; dunia yote imejaa utukufu wake!” (fungu la 2). Kadiri Mungu alivyoanza kunena, milango ya hekalu ilianza kutikisika na moshi ukajaza nyumba. Tukio lote “lilimfunua” kabisa Isaya kiasi cha yeye kulia, “Ole wangu! Kwa maana nimepotea; kwa sababu mimi ni mtu mwenye midomo michafu, nami ninakaa kati ya watu wenye midomo michafu; na macho yangu yamemwona Mfalme, Bwana wa majeshi” (fungu la 5). Je tunaweza kumlaumu? Ni nani anayeweza kumwona Mungu kwa mbali na asijifiche?

Isaya alishangazwa na utakatifu na ukuu wa Mungu, lakini Mungu hajidhihirishi ili tu atushangaze. Udhihirisho binafsi wa Mungu mara nyingi hufuatiwa na ombi. Hivi ndivyo ilivyokuwa, kwa mfano, alipompatia Yohana ufunuo wa Yesu Kristo akiwa uhamishoni katika kisiwa cha Patmo. Njozi ya Yohana ya mwisho wa dunia na kurudi kwa Kristo ilipaswa kushirikishwa na watu wengine. Vivyo hivyo, Mungu alipojidhihirisha mwenyewe kwa Isaya, alikuwa akitafuta mjumbe aliye tayari kutangaza ujumbe wake wa upendo na onyo. Jibu la Isaya lilikuwa la pekee kwa vizazi vyote: “Mimi hapa! Nitume mimi” (fungu la 8).

Mtu na Mtu

Lakini Mungu alifanya jambo lililomuongoza Isaya kukubali wito wa kwenda. Mungu alipoondoa uovu wake na kutakasa dhambi zake, mwikio wa Isaya kwa neema ya Mungu ulikuwa “Nitakwenda” (Isaya 6:8). Uamuzi wake wa kukubali utume wa Mungu ulifanyika katika uzoefu binafsi wa ibada pamoja na Mungu. Nguvu ambayo angeionyesha kwa umati ilikuwa ni nguvu aliyoiipata akiwa katika faragha na Mungu. Mwandishi aliyetiwa mafuta, nabii mwaminifu, mtangazaji asiye na woga – utambulisho

wote wa nje wa Isaya uliakisi jinsi alivyokuwa ndani yake. Alikuwa katika madhabahu na Mungu!

Tunapomaliza uzoefu wa Siku 10 za Maombi, ni tumaini letu kwamba umeanza kujenga upya madhabahu yako binafsi ya ibada ya kila siku. Ni tumaini letu kwamba familia yako imekubali kukutana na Mungu kila siku asubuhi na jioni. Lakini zaidi ya hivyo, tunaomba kwamba ukubali mwaliko maalumu wa Mungu wa kwenda. Katika kufanya hivyo utaguswa, pia “Kwa wale wanaojiweka wakfu kikamilifu ili Bwana aweze kuweka mguso wake katika midomo yao, neno limenenwa, Nenda katika shamba la mavuno. Nitashirikiana na wewe” (Ellen G. White, *Gospel Workers*, uk. 23).

Tuombe pamoja.

Wakati wa Maombi (Dakika 30-45)

Kuomba Kupitia katika Neno la Mungu – Isaya 6:8

“Nimtume nani, naye ni nani atakayekwenda kwa ajili yetu”? Ndipo niliposema, “Mimi hapa, nitume mimi.”

“Nimtume Nani...?”

Mungu, ukweli kwamba unahitaji kuuliza swali hili ni karipio kwetu. Hatujasikiliza wito wa kutumika na kukutangaza. Nyakati fulani tunahisi kuzidiwa na kazi inayoonekana kuwa isiyowezekana ya uinjilisti duniani. Nyakati nyingine tunashughulika sana na maisha yetu, na mipango na shauku zetu. Tusamehe, Bwana. Tusamehe, na tutumie katika shamba lako, tunaomba. Amina.

“Mimi Hapa!”

Mpendwa Yesu, umeita, na sasa nimeitika. Mimi hapa. Sina mengi ya kuleta, lakini kufahamu kwamba upo upande wangu ni yote ninayohitaji kufahamu, kwani kwa wale unaowatuma, utawawezesha pia kufanya kazi zako. Hivyo, mimi hapa, Bwana. Mchukue mwanamume/ mwanamke/mtoto huyu na ujitukuze Mwenyewe kupitia katika maisha yangu. Amina.

“Nitume Mimi”

Mungu, tunatambua kwamba kusudi la maisha yetu ni kudhihirisha tabia yako ya upendo kwa dunia hii. Tafadhali tutume katika shamba lako. Tuonyeshe mahali unapofanya kazi ili tuweze kuungana na Roho yako. Ongoza mawazo na mipango yetu, urafiki wetu, na jitihada zetu za utume. Tunataka kung’aa kwa ajili yako, Yesu. Tutume! Nitume! Nitakwenda! Amina.

Mapendekezo zaidi ya Maombi

Shukurani na Sifa: Shukuru kwa mibaraka mahususi na msifu Mungu kwa wema wake.

Kuungama: Tumia dakika chache kwa ajili ya maungamo binafsi na msifu Mungu kwa msamaha wake.

Uongozi: Mwombe Mungu akupatie hekima kwa changamoto na maamuzi ya sasa.

Kanisa Letu: Ombea mahitaji ya kanisa katika ngazi ya majimbo na kanisa la ulimwengu (tazama karatasi nyingine yenye mahitaji).

Mahitaji ya eneo mahalia: Ombea mahitaji ya washiriki wa kanisa, familia, na majirani.

Sikiliza na Itika: Tumia muda kuisikiliza sauti ya Mungu na kuitikia kwa sifa au wimbo.

Mapendekezo ya Nyimbo

Nitakwenda Utakaponituma (#60)

Nipo Bwana Nitume (#107)

Anisikiaye (#109)

Tumesikia Mbiu (#108)



Kurejea Madhabahuni

Lakini saa inakuja, nayo sasa ipo,
ambayo waabuduo halisi
watamwabudu Baba katika roho na
kweli. Kwa maana Baba awatafuta
watu kama hao wamwabudu.

Yohana 4:23